

**Uunga siunnersuut: Uranimik il. il., misissueqqaarnermut, ujaasinermit piiaanermullu
inerteqquteqarneq pillugu Inatsisartut inatsisaat**

*Ineqarnermut, Attaveqaasersuutitut, Aatsitassanut, Inatsisit Atuutsitsinneqarnerannut
Naligiissitaanermullu Naalakkersuisumit saqqummiunneqartoq*

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerpeqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai:

Inatsisartunut ilaasortaq Mariane Paviasen, Inuit Ataqatigiit, siulittaasoq
Inatsisartunut ilaasortaq Lars Poulsen, Siumut, siulittaasup tullia
Inatsisartunut ilaasortaq Charlotte Pike, Inuit Ataqatigiit
Inatsisartunut ilaasortaq Karl Tobiassen, Siumut
Inatsisartunut ilaasortaq Knud Mathiasen, Inuit Ataqatigiit
Inatsisartunut ilaasortaq Harald Bianco, Inuit Ataqatigiit
Inatsisartunut ilaasortaq Aslak Wilhelm Jensen, Siumut

Ataatsimiititaliap UKA2021-mi ulloq 5. oktober 2021 siullermeerinninnerup kingorna siunnersuut misissuataarpaa. Inatsissatut siunnersuut ataatsimiititaliap ataatsimiinnerni sisamaasuni oqaluuserisarpaa.

A. Siunnersuutip imarisai siunertaalu

Naalakkersuisut siunnersuuteqarnermikkut uranimik misissueqqaarnermut, ujaasinermit piiaanermullu inerteqquteqarnissaq kissaatigaat. Tamatuma saniatigut Naalakkersuisut kissaatigaat suliniutini aatsitassanut il.il. allanut sammisinneqartuni uranimik akoqarsinnaaneq qummut 100 ppm-inut killilerneqassasoq. Siunnersuutikkut Naalakkersuisut periarfissinneqarputtaaq, killiliinerit qulaani taaneqartut naapertorlugit iluaquteqarniartoqarsinnaanngikkaangat, atortussiassanik aatsitassanit pisunik misissueqqaarnermut, ujaasinermit piiaanermullu akuersissut suugaluartulluunniit

killilerneqarnissaannut utertinneqarnissaannulluunniit. Tamanna siunnersuutip §-iini 1-imi 3-milu takuneqarsinnaavoq.

Tamatuma saniatigut Naalakkersuisut piginnaatinneqarusupput inerteqquteqarnerup pinngoqqaatinut allanut ulorianartunik qinngualanilinnut uraniunngitsunut annertusineqarsinnaaneranut malittarisassiorsinnaanissamut, kiisalu akorisinnaasanut killiliussanik aamma pinngoqqaatinik ulorianartunik qinngualanilinnik misissueqqaarnermut, ujaasinnermut piiaanermullu akuersissutinik utertitsisarneq pillugu aalajangersakkanik eqqussisinnaanissamut. Tamanna siunnersuutip §-iisa aappaanni takuneqarsinnaavoq.

B. Siunnersuutip Inatsisartuni siullermeerneqarnera

Siullermeerinninnermi Inatsisartuni tunngaviusumik isummat pingasut ersersinneqarput. Inuit Ataqtigiiit Nalerarlu uranimik misissueqqaarnermut, ujaasinnermut piiaanermullu siunnersuummi nalinginnaasumik inerteqquteqarneq, kiisalu aatsitassat allat ulorianartunik qunngualanillit inerteqqutigineqarsinnaaneritut periarfissaq tapersersorpaat.

Inuit Ataqtigiiit pingaartippaat 2013-imi aatsitassanik ulorianartunik qinngualanilinnik piiaaqqusinneginnerup inatsisartuni amerlanerussuteqaqqarluni atorunnaarsinneqarnera minnerunngitsumik Kalaallit Nunaata Kujataani inuussutissarsiornermik ingerlataqartut innuttaasullu akornanni nalorngissuteqarnermik ernumassuteqarnermillu annertuumik pilersitsisimammat. Nalorngissuteqarneq tamanna nunalerinnermik inuussutissarsiuteqarnerup, takornariaqarnermik inuussutissarsiuteqarnerup, inuussutissarsiutillumi allat aamma ineriartortinneqarnerannik unikkaallatsitsisimavoq. Inatsisissatut siunnersuut manna akuersissutigineqarpat inuussutissarsiortut innuttaasullu nalorngissuteqarnerat ernumassuteqarnerallu peerneqassaaq, tamannalu pitsaasutut isigineqarpoq. Ilanngullugu oqaatigineqarpoq namminiilivinnissaq aatsitassanik ulorianartunik qinngualanilinnik piiaanermik tunngaveqartinneqarsinnaanngimmat, akerlianilli aatsitassat taamaattut piiarneqarsinnaanerannik inerteqquteqarneq inuussutissarsiutit allat ineriartortinneqarsinnaaneritut toqqissisimanermik innuttaasunut tunniussaqaarsinnaammat. Siunnersuut aamma aatsitassarsiornep ineriartortinneqarneranut aporfiusussatut isigineqanngilaq, nunammi allat aatsitassarsiornermik ineriartortitsiviusimasut aamma taamaqataalik inerteqquteqarmata. Inuit Ataqtigiiit immikkut erseqqissarpaat piiaanermit igitassat imaluunniit uranip atorneqarneranit sinneruttut isumannaatsumik siunissamullu ungasinnerusumut atasinnaasumik toqqartarineqarsinnaaneritut periaatsimik suli nassaartoqaarsimanngimmat. Kalaallit Nunaat eqqagassat assigiinngitsut passunneqartarnerat eqqarsaatigalugu annertuunik unammilligassaqareerpoq, taamaattumillu uranimik piiaanep ajornartorsiutinik tamakkuninnga annertuserujussuartsinnassalluni. Siunnersuutip matuma tamanna pinngitsoortissinnaavaa. Inuit Ataqtigiiit ilanngullugu oqaatigivaat Inatsisartunut qinersineq ingerlanneqaqqammersoq uranimik piaasinnaanermit isumaqataaneq isumaqataanneginnerluunniit pillugit qinersinertut toqqaannartumik

oqaatigineqarsinnaanngimmat, kisiannili uran qineqqusaarnermi ima initutigisimasoq, minnerunngitsumik uranisiornermik piaasinnaanermillu unitsitsinissamik partiit naalakkersuisuutitaqartut qineqqusaarnermi neriorsuutaat pissutigalugit, siunnersuut manna neriorsuutip tamatuma timitalerneqarneratut isigineqartariaqarluni.

Naleqqap siunnersuummik tapersiineri immikkut pingaartippaa nunarsuarmi sumiiffinni allani uranimik piaaneq amerlasoorpassuartigut sumiiffiit uranimik piiaaviusut eqqaanni uumasooqassutsimik naasoqassutsimillu annertuumik innarliisarsimammat, tamannalu akuerineqarsinnaanngitsoq. Naleqqap oqaatigaa aatsitassanik ulorianartunik qinngualalinnik piiaanissamut passussinissamullu ullumikkut teknikikkut atortulersuutit sulii ima pitsaatigisumik ineriartortinneqarsimannginngimmata piiaaneq passussinerlu toqqissisimasumik ingerlanneqarsinnaanatik. Siunissami aatsitassanik taamaattunik piiaarnermut passussinermullu teknikikkut periarfissanik nutaanik isumannaannerusunillu ineriartortitsisoqarpat taamanikkornissaanut piiaasoqarsinnaassanersoq isummerfigineqarsinnaassaaq. Kalaallit Nunaanni qaqqat allamut nuunneqarsinnaanngillat, tassaniittuartussaapput, taakkulu kingulissatsinnut isumannaatsumik iluaqutiginiarneqarnissaannut kingornutassanngortinneqarniarlik. Naleraq tamatuma saniatigut isumaqarpoq ullumikkut aatsitassarsiornermi isertitat ukiumut 75 mio. kr.-init amerlanerugaangata taakku ataatsimoortumik tapiissutit ikilisinneqarnerisugut naalagaaffillu avinneqartarnissaannik aaqquissuussisimaneq tunngavissiisoq aatsitassarsiornermik annertuumik ingerlatsiniarluni suliniutit utaqqisikkallarneqarnissaannik isertitanik agguariaatsimik Kalaallit Nunaannut iluaqutaanerusumik angusaqartoqarsinnaanerata tungaanut.

Atassutip siunnersuut taperserpaa, ersersilluguli sumiiffinnut inoqarfiusunut qanittumi ujaasineq piiaanerlu sumiiffinnut inuilaamiittuni ulorianartorsiortinneqarsinnaasunillu uumasooqanngitsuni ujaasinerup piiaanerullu immikkoortinneqarsinnaanissaat isumaliutigineqarsinnaasoq. Atassutip oqaatigaa inuussutissarsiorneq killiliussatut atugassarititaasunik isumannaatsunik patajuutsinillu nalinginnaasumik pisariaqartitsimmat, siunnersuullu manna ilaatigut tamatumunnga akerliusutut oqaatigineqarsinnaammat. Atassutilli erseqqissarpaa ataqqigamiuk qineqqusaarnermi kingullermi uran pillugu apeqqut annertuumik pingaartinneqarsimammat, taamaattumillu siunnersuutip saqqummiunneqarnera pissusissamisoortutut isigalugu.

Siumut aamma Demokraatit Kalaallit Nunaanni aatsitassarsiornernu ineriartorneranut aningaasalersorneqarneranullu siunnersuutip aporfissanik pilersitsinissaa ernumanartutut oqaatigaat, minnerunngitsumik Inatsisartut peqataatinngit nalunaarutitigut inerteqquteqarnerup annertusineqarsinnaanerani Naalakkersuisut kissaateqarnerata malitsigisaanik.

Siumut oqariartuutigaa nunarput pisuussutini ulikkaartoq, uumaatsunik aammalu uumasunik. Taakkulu atorluarneqarnissaat aporfilersuinnarniarutsigu, naak inatsimmi piumasagaatit malinneqaraluarpataluunniit, taava inuiaat kalaallit aningaasarsiorinissaannut siuarsaniarnermut aporfilersuinerut taasariaqassaasoq. Allatut oqaatigalugu, naalagaafinngornissamut aqummut qanillinissamut nangiarnertut isumaqarfisariaqarluni. Inatsisissatut siunnersuummi siunertarineqartoq aatsitassaq saffugassanik qaqutigoortunik akullit killissaat 100 ppm-imut pisinneqassasoq siunertaasoq. Siumullu isumaqartoq 100 ppm-imut inissiisimaneq nalilersorneqarluartariaqartoq. Sinerissami piffinni arlalinni aningaasarsiorsinnaanermik mattussineq akuerinngilarput. Siumup qulaajaquaa 100 ppm-imut inissiinerup annikitsumik piiasinnaasunut soorlu Tugtupit-imik piiasinnaanermut qanoq sunniteqassanersoq. Aannikitsumik piiasinnannaanermut akuersissutaatillinnut aammalu aatsitassarsiorinissamik ingerlataqarusuttut soorlu Tanbreez-ip suliniutaanut unitsitsinermik sunniteqassanersoq paasilluarnerusukkitsik. Tusarniaanermi ersarissumik allassimammasoq nunatsinni allaat Guld-imik kanngussamillu aatsitassarsiorsinnaanerit unitsinneqarnerinik inatsisissatut siunnersuut kinguneqassasoq, ujaqqat saffugassanik qaqutigoortunik 100 ppm-i qulaallugu akoqarnerat peqqutaalluni. Tunup avannnaarsuani Citronfjord-imi Zink-imik akerlussamillu (bly) aatsitassarsiorsinnaanerit unitsinneqarnissaannik kinguneqarnissaat tusarniutit akissutaanni uppersarsarneqartoq maluginiaritsik. Taamaattumik aatsitassarsiorsinnaanerit aporfilersorneqarnerat nunatsinni isaatitsissutaasinnaasunik ujartuinerut naaggaartornerit nunatsinni aalisarnerinnarmik isaatitsissuteqarnissamik Naalakkersuisooqatigiit siunertaqarnerat naqissuserneqartussanngortoq.

Tamatumunnga atatillugu erseqqissarneqarpoq nalinginnaasumik isumaqatigiissutaammat aatsitassanik piianeq isumannaallisaanermut piumasagaatit sakkortuut isiginiarlugit ingerlanneqartartussaammat, taamatullu aamma Aatsitassat pillugit inatsit avatangiisillu pillugit inatsisiliornerit tamatuma pinissaanut tunngavissaareermata isumannaatsut. Partiit ernummatigaat matumani siunnersuutikkut namminiilivinniarluni suliniarneq kinguarsarneqartussaammat, siunnersuutimmi, minnerunngitsumik siunnersuummi § 2-mi Naalakkersuisunut piginnaatitsissutissatut siunnersuutigineqartoq eqqarsaatigalugu, aatsitassarsiornermut aningaasaleeqataarussuseqarnermik annikillisitsisussaammat.

C. Tusarniaaneq

Siunnersuut piffissami 2021-mi juulip ulluisa aappaanniit aggustip ulluisa aappaannut tusarniaatigineqarsimavoq. Inatsimmut nassuaatinut ilanngussami 1-imi tusarniaanermi akissutit tiguneqarsimasut Naalakkersuisut nassuiaateqarfigaat. Ataatsimiititaliap pissutsit tusarniaanermi eqqartorneqartut Naalakkersuisunut apeqquteqartarnermigut itisilertissimavai.

D. Sassarfigineqarneq

Siunnersuummik matuminnga suliarinninnerminut atatillugu ataatsimiititaliaq Sulisitsisunik/Grønlands Erhverv sassarumasimaneranik akuersivoq sassartitsillunilu.

Sassartitsinermi tassani minnerunngitsumik ersersinneqarpoq ernummatigineqarmat siunnersuutip ilaa Naalakkersuisut nalunaarutikkut inerteqquteqarnerup aatsitassanut ulorianartunik qinngualaneqartunut allanut uraniunngitsunut annertusisitsisinnaaneranut tunngasoq inuussutissarsiummi aningaasaliissuteqarusussutsimut ajortumik sunniteqarsinnaammat. Sulisitsiullu/GE-p erseqqissarpaa uranimik inerteqquteqalersitsiniarnermut ilanngunnaratik uranimut piiannngilluinnarnissamut inatsisiliorneq taannarpiaq pinnagu inatsisissamili §2-pillugu sassarumasimallutik. Ataatsimiititaliap tamanna Naalakkersuisunut saqqummiuppaat, tamannalu pillugu ataani immikkoortoq F innersuussutigineqarluni.

E. Apeqqutit ilisimatitsiviusumillu ataatsimeeqateqarneq

Siullermeerinninnermi oqallinneq tunngavigalugu aamma susassaqartunit assigiinngitsunit tusarniaanermi akissutit kiisalu ataatsimiititaliap Sulisitsisunik/Grønlands Erhverv sassartitsinera tunngavigalugit ataatsimiititaliaq Naalakkersuisunut assigiinngitsunik apeqquteqarpoq. Ataatsimiititaliap apeqqutai Naalakkersuisullu akissutaat ilanngussami A-mi takuneqarsinnaapput. Ataatsimiititaliami ikinnerussuteqartut isumaliutissiissuteqannginnermi Naalakkersuisut sukumiinerusunik apeqquteqarnissaminnik kissaateqarsimagaluarpot, tamannali isumaqatigiissutigineqarsinnaasimanani, amerlanerussuteqartut isumaqarmata apeqqutiginiarneqartutut saqqummiunneqaqattaartut akissutissarsereerlugit.

Ataatsimiititaliaq tamatuma saniatigut Naalakkersuisunik ataatsimeeqateqarpoq siunnersuummut tunngatillugu paasissutissanik sukumiinerusumik pissarsinissaq siunertaralugu. Naalakkersuisup pitsaasumik paasissutissiilluni partiit tamaasa aallartitaqarnissaat pingaartissimammagu ataatsimiititaliamit qutsavigaarput.

F. Ataatsimiititaliap siunnersuummik suliarninnera

Siullermeerinninnermi oqallinneq, tusarniaanermi akissutit tiguneqartut kiisalu ataatsimiititaliap Sulisitsisunik/Grønlands Erhverv sassartitsisimanagera tunngavigalugit ataatsimiititaliaq Naalakkersuisunut assigiinngitsunik apeqquteqarpoq. Ataatsimiititaliap apeqqutit akissutillu ilaannik ataani assersuusiortoq.

Misissueqqaarnermik, ujaasinermik piiaanermillu suliniutit akuersissuteqarfiusut maanna ingerlasut pillugit ilisimatitsissuteqaqqullugit Naalakkersuisut ataatsimiititaliamit qinnuigineqarput, tamatumanilu paasissutissiissutigalugu taakku siunnersuummit eqqugaassanersut/qanoq eqqugaanersut.

Naalakkersuisut akippot, *Aatsitassanik misissueqqaarnissamut aamma misissuinissamut akuersissutit amerlanersaasa iluanni uraneqarpoq, kisianni assigiinngitsumik annertussusilimmik. Kisianni peqarfiit ataasiakkaat aatsitassarsiorluni misissuinissamut*

siunnerfigineqartut imaluunniit peqarfiit nassaarineqarsimasut, uranimut inerteqquteqarnermut inatsimmi killissaliussap 100 ppm-mik annertussuseqarnera ajornartorsiutigissagaat ilimanangilaq. Taamaattumik pisut amerlanersaanni pisinnaatitsissummik pigisaqartup aatsitassarsiorluni misissuineri suut siunnerfiginerai, peqatigisaanillu piiaanissamut akuersissummik qinnuteqaammik piareersaateqarfiginerai, ilisimaneqalinngippat, urani ajornartorsiutaassanersoq taamaassannginnorsorluunniit nalilerneqarsinnaasangilaq.

Sumiiffik akuersissuteqarfusooq assigiinngitsunik suussusilinnik peqarfeqarsinnaasarpooq. Akuersissutip ataatsip iluani peqarfiit ilai uranimik ajornartorsiuteqarfusinnaapput, peqarfiillu allat ajornartorsiuteqarfuiunngissinnaallutik. Assersuutissaavoq Sarfartumi Hudsonip aatsitassarsiorluni misissuinissamut akuersissut pigisaa. Sumiiffiup akuersissuteqarfusup iluani assigiinngitsunik peqarfiit marluk paasineqarput. Peqarfiup aappaa maannamut uranimik ajornartorsiuteqarfiuvoq, kisianni aappaa taamaagani. Assersuutissaq alla tassaavoq Kalaallit Nunaata kujataa tamarmi, uraneqarfittut ilisimaneqartoq. Sumiiffimmi tassani tamatuma saniatigut kuulteqarfeqarpoq, saffiugassanik nalinginnaasunik (kanngussak, aqerloq, zink) peqarfeqarluni aammalu grafitinik peqarfeqarluni. Peqarfiit taamaattut taakkua nalinginnaasumik uranimik ajornartorsiuteqarfuiunngillat, naak sumiiffiup akuersissuteqarfusup pineqartup iluani annikitsunik uranimik peqarfeqaraluarluni.

Erseqqinnerusumik Naalakkersuisut paasissutissiissutigaa Orano Mining aamma GME uranimik misissueqqaarnermut, ujaasinermut piiaanermullu siunnersuummi nalinginnaasumik inerteqqummut kiisalu siunnersuummi 100 ppm-imut killigititassut siunnersuutigineqartumut ilaatinneqassasut. Ingerlatseqatigiiffiit taaneqartut tamanna nalunngereerpaat. Tamatuma saniatigut Naalakkersuisut paasissutissiissutigaa suliassaqaqarmat arlalinnik assigiinngitsunik inerteqquteqarnermut/killigititamut ilaatinneqalersinnaasunik Naalakkersuisullu akissutaannut ilanngussami 1-imi takuneqarsinnaasunik.

Ataatsimiititaliap Naalakkersuisunut piumasaraa paasissutissiissutigeqqullugu ilanngussami 1-imi kisitsisit taaneqartut 145.943.572 aamma 35.452.315 kr. sumut tunnganersut? Assersuutigalugu tamatumani ujaasinermut aningaasartuutit pineqarpata taava akuersissutaatillip taakku Namminersorlutik Oqartussanit taarserneqarnissaat piumasarisinnaavaa, siunnersuut akuersissutigineqassappat tamatuma kingorna piaanissamut akuersissuteqarfigineqarnissaq anguneqarsinnaassangippat?

Paasissutissat tamakku siunnersuummut nassuiaatini takuneqarsinnaanissaat sooq Naalakkersuisut pissusissamisoortutut isigisimanngilaat?

Naalakkersuisut ilanngullugu paasissutissiissutigaa *siunnersuutip piiaanissamut akuersissutip pioreersut sunnissanngikkai, tassami siunnersuut akuersissutitut siunnersuutip*

akuerineqareernerata kingorna tunniunneqartunut taamaallaat atuutissammat. Misissueqqaarnissamut, aatsitassarsiorluni misissuinissamut imaluunniit piiaanissamut akuersissutit tunniunneqareersut taamatuttaaq kalluarneqassanngillat. Paarlattuanik piiaanissamut akuersissutit inatsisip atuutilereernerani tunniunneqartut pineqartunut ilaassapput aammalu inatsit malittussaassallugu.

Pinngoqqaatinut qinngornernik ulorianartunik akulinnut allanut inerteqquteqarnek, siunnersuummi § 2 naapertorlugu aalajangersarneqartoq, piffissaq tamanna pillugu nalunaarutip aalajangersarneqarnera aallarnerfigalugu siusinnerpaamik atuutilertussaavoq. Siunissami pinngoqqaatinut qinngornernik ulorianartunik akulinnut allanut inerteqquteqarnissaq taamaalilluni aamma piiaanissamut akuersissutitut pioreersunut atuuttussaannngilaq.

Naalakkersuisut akissutaannut ataatsimiititaliaq qujassuteqarpoq, Naalakkersuisunulli uku nassuiaateqarfigissagaat piumasarissallugu;

- Siunnersuut piiaanissamut akuersissutitut pioreersunut qanoq sunniuteqassava, taakku akuersissuteqarfiusup annertusineqarnissaanik sumiiffiataluunniit allanngortinneqarnissaanik qinnuteqarpata?
- Tamatuma saniatigut Naalakkersuisut qinnuigineqarput nassuiaateqarfigeqqullugu piiaanissamut akuersissutit pioreersumik pigisaqartut akuersissuteqarfiusumi uraneqassutsimik misissuinissamik peqquneqassanersut? Taamaattoqassappallu tamatuma qanoq akeqarnissaa naatsorsuutigineqarpa?
- Siunnersuut suliniutinut allanut sunniuteqassava, assersuutigalugu sanaartugassanut annertunerusunut atatillugu qaarsumik qaartitsisoqassatillugu?
- Sanaartugassatut suliniutinut qaarsumik qaartiterinermik/nuussinermik ilaqartussanut siunissami pisortanit piumasaqaataasartussanut atatillugu qaarsup pineqartup aatsitassanik ulorianartunik qinngualanilinnik akoqarnerata misissorneqartarnissaanik piumasaqaateqartoqassava? Taamaattoqassappallu tamanna aningaasartuutit sunik kinguneqassava?

Ataatsimiititaliap Naalakkersuisut qinnuigai siunnersuutip akuersissutigineqarneratigut aatsitassanik aalajangersimasunik siunissami ujaasinissaq piiaanissarlugu ajornarsisinneqassanersoq/ajornakusuulersinneqassanersoq nassuiaateqaqqullugit. Tamatumunnga ilanngullugu pinnerasaasiassanik piiaalluni annikitsumik piiaalluni suliniutit qanoq siunnersuummit sunnerneqarnissaat pillugu paasissutissinneqarnissaq ataatsimiititaliamit kissaatigineqarpoq.

Naalakkersuisut tamatumunnga akissuteqarlutik oqaatigaat *pingaartumik teknologiimut mingutsitsinngitsumut atugassanik pinngoqqaatinik/aatsitassanik piiaanermi uran/thorium akuunerat ajornartorsiortitsisinnaasoq. Kalaallit Nunaata ukiorparujussuarni aatsitassanut*

qaqutigoortunorpiaq periarfissaqarfiusut nittarsaattarsimavai. Nittarsaassinermi ilaatigut pissutaavog Kinap nunarsuarmi niuerfimmi annertunerpaarpaajunera aammalu Kalaallit Nunaanni periarfissaqarfiusut pissutaallutik EU-mit aamma Amerikamit Avannarlermit soqutiginninnerup ujartuinerullu annertusiartornerat. Naalakkersuisut thoriumimut tunngatillugu inatsisissatut siunnersuummi paragraf 2 atussappassuk pingaartumik ajornartorsiut pilertussaavog. Aatsitassanut qaqutigoortunut suliassat amerlanersai thoriumimik qaffasissumik akoqartarput, Killavaani peqarfik pinnani. Paarlattuanik peqarfiit ilaanni uranip akuunera annikittarpoq.

Aatsitassanut qinngornernik ulorianartunik, taamaalillunilu thoriumimik, akulinnut killilersuilluni inerteqquteqarneq, aatsitassat qaqutigoortut (REE) siunnerfigineqarlutik, kisianni aamma thorium aatsitassat immikkuullarissut suliarineqarneranni suliap ingerlanerani aamma saqqummertussaalluni aammalu 'waste rocks'-iniilertussaalluni imaluunniit 'tailings'-iniilertussaalluni Kalaallit Nunaanni suliassanut arlalinnut pingaaruteqartussaavog. Suliassat pilertussat arlallit, suliassat ilai aatsitassarsiorluni misissuinissamut akuersissummik peqarlutik, piiaanermi ajornartorsiulertussaapput, pissutigalugu peqarfiit aatsitassanik qinngornernik ulorianartunik qaffasissunik pinngortitamittunik akoqarmata, pisumilu matumani taanna thoriumiulluni.

Suliassat taakkua tassaasussaapput:

- *Kuannersuit (Kvanefjeld) – uran 250 ppm aamma thorium 800 ppm.*
- *Sarfartoq, Kalaallit Nunaata kitaa – REE-nik peqarfimmut atatillugu thoriumimik 1.000 ppm miss. akoqarpoq.*
- *Motzfeldt Tasia – tassani maannakkut akuisa, maannakkorpiaq uranimut 70 ppm-imi aamma uranimut 120 ppm-imi, isumalluummi 340 mio.t-mi agguaqatigiissillugu akuusut annertussuseqartut oqaatigineqartut attanneqarsinnaanersut naliliinissamut misissuinerit arlallit aammalu misissueqqissaarnerit arlallit pisariaqarput. Misissugassani ataasiakkaani urani 2.400 ppm angullugu uranimik akoqartut paasineqarpoq.*
- *Qaqaarsuk, Kalaallit Nunaata kitaa. Thoriumimik akoqarnera 1.000 ppm missaanniippoq.*
- *Milne Land, Tunumi peqarfik nunap iluani sioqqanik oqimaatsunik peqarfiusog titaniumitaqartoq (rutil), zirkoniumitaqartoq (zirkon) aamma REE-nik (monazit) akoqartoq. Monazit REE-t saniatigut aamma thoriumimik akoqarpoq. Akui 1.000 ppm angullugu nikerarput.*
- *Tikiussaq, Kalaallit Nunaata kitaa (akuersissuteqartoqanngilaq) Qaqaarsummut eqqaanarpoq REE-nik aamma fosforinik peqarluni, Qaqaarsummituut thorium 1.000 ppm missaani taamaaqataata missaanik annertussuseqarluni.*

Kuannersuarni eqqaanilu pinnersaasiassat (tugtupit) eqqarsaatigalugit Naalakkersuisut oqaatigaat tugtupit ujaqqat sanianiittut inissisimaqatigippagit assersuutigalugu luvjarit,

steenstrupinitaqarsinnaasut, qinngornernik ulorianartunik pisoqarsinnaavoq. Qinngornerit ulorianartut piussappata taakkua tugtupitimeersuussanngillat, kisianni steenstrupimeersuussallutik. Tugtupitinik piiaanermi killissaliussap 100 ppm qaangerneqarnissaa nalilersorniarlugu tugtupitinik peqarfinni uuttortaanernik suliaqartoqanngilaq.

Sumiiffimmi Kuannersuit eqqaanniittumi annikitsumik aatsitassarsiorluni ingerlataqarnernut tunngatillugu, sumiiffiup ilaa sorleq inatsimmit nutaamit eqqorneqassanersoq Naalakkersuisut maannakkorpiaq tamakkiisumik paasisimaaraat. Oqaatigineqassaaq sumiiffik ullumikkut GME-p aatsitassarsiorluni misissuinissamut akuersissummik peqarfia tamakkerluni eqqorneqanngissinnaammat, tassami sumiiffiit 100 ppm-imit annertunermik uranimik akullit kisimik inatsimmit eqqorneqartussaapput.

Sumiiffimmi ataatsimi 100 ppm sinnerlugu uranimik akoqartoq paasinarsissappat, sumiiffimmi tassani aatsitassarsiorluni ingerlatassanik suliaqartoqarsinnaassanngilaq, misissueqqaarnissamut akuersissut, aatsitassarsiorluni misissuinissamut akuersissut, piiaanissamut akuersissut imaluunniit annikitsumik aatsitassarsiorlunissamut akuersissut malillugu tamanna pinersaq apeqqutaanani.

Ataatsimiititaliap tamatuma saniatigut Naalakkersuisunut piumasaraa uku nassuiaateqarfigeqqullugit;

- Siunnersuut akuersissutigineqassappat annikitsumik aatsitassarsiornermut akuersissutinik qinnuteqaatit qanoq suliarineqartarnissaat Naalakkersuisut naatsorsuutigaa? 100 ppm-imik killissarititap qaangerneqarsimannginnera qinnuteqartup uppersarsaasertassavaa imaluunniit misissuinerit pisariaqartut Naalakkersuisunit ingerlanneqartassapput? Misissuinerup taamaattup qanoq akueqarnissaa naatsorsuutigineqarpa?
- Akuersissummik peqarani aatsitassanik katersineq piiaanerlu pillugit atortussiassat aatsitassanit pisut pillugit inatsimmi aalajangersakkanut siunnersuutip naapertuunnera Naalakkersuisut qanoq isigaat? Assersuutigalugu pinnersaasiassanik katersinerup piiaanerullu (tassunga ilanngullugu aatsitassanik piiaanermit qaarsunit qimaannakkamit) sumiiffinni 100 ppm sinnerlugu uranitaqartuni pinnginnissaa Naalakkersuisut qanoq nakkutiginiarpaat?

Ataatsimiititaliap taamatuttaaq Naalakkersuisunut apeqquteqartarnermigut itisilertinniarsimavaa aatsitassarsiornermi ingerlatseqatigiiffinnut ujarlertunut piiaasunullu pilersuisunut taamalu Nunatta Karsianut ingerlatat annikillisinneqarsinnaanerata malitsigisaanik siunnersuut sunik (aningaasatigut) kinguneqarsinnaanera naatsorsuutigineqarsinnaanersoq. Naalakkersuisut tamatumunnga tunngatillugu ilaatigut oqaatigaat taamatut naliliineq annertoorujussuarmik nalorninartortaqartussaammat, taamaattumillu tamanna aamma pissutigalugu Aningaasanut inatsimmi isertitsisoqarnissaa

missingersuutigineqarani. Naalakkersuisut tamatumunnga ilanngullugu oqaatigaat *maannakkorpiaq ingerlatseqatigiiffik ataasiinnaq, Greenland Minerals, aatsitassaqaarfik aamma uranimik akoqarluni, piiaanissamut akuersissummik qinnuteqaateqarluni ingerlasoq. Ingerlatseqatigiiffik ukiorpassuit ingerlaneranni aatsitassarsiorluni misissuineq ingerlassimavaa aammalu isumalluutinik piiarneqarsinnaasunik paasinarsisitsisimalluni, ilanngullugulu aningaasaqarnikkut naatsorsuinernik suliaqarsimalluni. Taamaattumik aatsitassarsiorluni misissuinermini suliaassanit "nutaanerusunit" allanit nalorninartoqarnera annikinneruvoq. Ingerlatseqatigiiffiup VSB-iani allassimavoq ingerlatseqatigiiffiit akileraarutaannit, iluanaarutinit akileraarutinit, royaltynit, aammalu toqqaannartumik akileraarutinit A-nit ataatsimut katillugu agguaqatigiissitsinermini ukiumut DKK 1,52 mia. naatsorsuutigineqartut. Kisitsit taanna Aningaasanut inatsimmi missingersuutini ilanngunneqanngilaq.*

Ataatsimiititaliap oqaatigissavaa kisitsit 1,52 mia. kr. taaneqartoq missingiinerummat ingerlatseqatigiiffiit namminneq paasissutissaataannik tunngavilik. Naalakkersuisut siuliisa § 37-ikkut apeqquteqarfigineqarnerminni tamanna uppersaatissaqartinnagu aamma akissuteqarfiginikuuaat.

Ataatsimiititaliap Naalakkersuisut qinnuigaat paasissutissiissutigeqqullugu piiaanissamik akuersissummik Naalakkersuisut itigartitsinerata malitsigisaanik Namminersorlutik Oqartussat taarsissuteqarnissamik piumasaqarfigineqarsinnaanersut inatsisilerinikkut nalilerneqarsimanersoq, kiisalu taamatut taarsiissuteqarnissamik piumasaqartoqassappat tamatuma annertussusissaa pillugu.

Naalakkersuisut oqaatigaat *pisinnaatitsissummik pigisaqartunut, suliaasaat inerteqquteqarnermik aaqgissuussinermit sunnerneqarsimasinnaasunut, taarsiinermik tunniussinissamut imaluunniit allatut taarsiissuteqarnissamut siunnersuummi inatsimmi tunngavissamik aalajangersaasoqanngimmat. Taamaattoq pisinnaatitsissummik pigisaqartut allanik tunngavilimmik taarsiivigineqarnissaminnut imaluunniit allatut taarsiisoqarnissaanut Namminersorlutik Oqartussat suliakkiullugit suliakkiisinnaasut mattunneqarsinnaanngilaq.*

Apeqqut 5 [ilanngussaq A takujuk] innersuussutigalugu oqaatigeqqinneqassaaq, siunnersuut taarsiissutitalimmik arsaarinninnermut inatsisaanngimmat, taamaattumillu itigartitsineq taarsiissutitalimmik arsaarinnissutaasussaasoq naliliisoqarpat. piiaanissamut akuersissutit itigartinneqarsinnaasussaanatik. Taamaattumik Naalakkersuisut naliliippata tamanna taarsiissutitalimmik arsaarinnissutaatinnagu itigartitsisoqarsinnaasoq, Naalakkersuisut piiaanissamut akuersissummik tunniussinissaq aatsaat itigartissinnaavaat.

Taamaattoq tassunga atatillugu pisinnaatitsissummik pigisaqartup itigartinneqartup Naalakkersuisut aalajangiinerannik eqqartuussivinnut suliakkiussisinnaanera, tassungal

atatillugu itigartitsineq taarsiissutitalimmik arsaarinnissutaanerarlugu oqariartuuteqarnissaa, aamma mattunneqarsinnaanngilaq. Taamatut pisoqarnerani taarsiinissamut piumasaqaammut pisinnaatitsissummik pigisaqartoq aalajangersimasoq, suliassaq aalajangersimasoq aammalu allatigut pisut arlalippassuit apeqqutaasussaapput.

Apeqqut 6 [ilanngussaq A takujuk] innersuussutigalugu oqaatigineqassaaq. Naalakkersuisut naliliinerat malillugu siunnersuutip akuerineqarnera imminermi taarsiissutitalimmik arsaarinninnerusinnaanngitsoq. Taamaattumik aamma Naalakkersuisut naliliinngillat Namminersorlutik Oqartussat inatsisip akuerineqarnerata malitsigisaanik taarsiivigineqarnissamik piumasaqaateqarfigineqarsinnaasut.

Uranimik qalluinissamut ”isumaqataalluni akerliulluniluunniit” innuttaasunik taasisitsisinnaaneq siullermeerinninnermi oqallisigineqarpoq. Naalakkersuisut taamatut innuttaasunik taasisitsisinnaanermut akerliugallarnernut innuttaasunik taasisitsinerup taamaallaat najoqqutassat, taamalu Naalakkersuisunut pituttuisuunani, taasisitsinerusinnaanera tamatumalu saniatigut aningaasartuutaangaatsiarnissaa tunngavilersuutigineqarput. Ataatsimiititaliaq apeqqummini Naalakkersuisut akissuteqaamminnik itisiliinissaannik qinnuteqarpoq: Naalakkersuisut uranimik piiaanissaq pillugu innuttaasunik taasisitsinissamik kissaateqanngillat. Partiit uranimik piiaanissamik inerteqquteqarnermik atuutsitsilernissaq kissaatigigaat, aprilimi qinersinermut naalakkersuisooqatigiinni partiit qineqqusaarutaanni ilaavoq. Taamaattumik Naalakkersuisut isumaqarput inatsisissatut siunnersuut qineqqusaarnermi neriorsuutinik naammassinninnerusoq. Ilitsersuisussamik innuttaasunik taasisitsineq aningaasartuuteqarfiungaatsiartussaavoq, naggataatigullu uranimik piiaanissamut naalakkersuisooqatigiit isummernerannik allanngortitsisussaananani. Tamanna tunngavigalugu naliliisoqarpoq Inatsisartut innuttaasunit qinigaasut, taamaalillutillu nunatsinni qinersisartunut sinniisaasut, aalajangiissasut.

Ataatsimiititaliap Naalakkersuisut akissutaat paasilluarlugu tusaatissatut tiguaa. Ataatsimiititaliap tamatumunnga atatillugu oqaatigissavaa innuttaasut taasisinneqarnerat inatsiseqartitsinikkut Naalakkersuisunik pituttuisinnaanngimmat.

Ataatsimiititaliap taamatuttaaq Naalakkersuisut qinnuigisimavaat sumiiffiit inoqarfiit ulorianartorsiortinneqarsinnaasunillu uumasullit qanigisaasa ungasigisaasalu immikkoortinneqarsinnaanernut periarfissat siullermeerinninnermi oqaatigineqartut pillugit isummaminnik ersersitseqqullugit. Naalakkersuisut tamatumunnga atatillugu oqaatigaat uranimik piianeq eqqarsaatigalugu immikkut pineqartoqarnissaa tapersersunngikkitsik. Tamanna sukumiinerusumik tunngavilersorneqanngilaq, oqaatigineqarlunili tamanna Naalakkersuisut naalakkersuinikkut ingerlatsinerannut akerliussaq, tamatumani uranimik piiaanissaq pinngitsoortinniarneqarmat. Naalakkersuisut taamatut nalunaaruteqarnerat

ataatsimiititaliap tusaatissatut tiguaa paasillugulu tamatumani naalakkersuisoqatigiinnit naalakkersuinikkut kissaat pineqartoq. Ataatsimiititaliap maluginiarpaa Naalakkersuisut aamma isumaqarmata siunissaq ungasinnerusoq isigalugu ”illoqarfinnut qanittumi aatsitassanik piianeq” kissaatiginarnersoq oqallisigineqartariaqartoq. Tamanna aatsitassat pillugit inatsisissap aggersup suliarineqarneranut atatillugu pissaaq.

Siunnersuummi § 2 immikkut eqqarsaatigalugu

Aallaqqaatigalugu oqaatigineqartutut siunnersuummi § 2-kkut Naalakkersuisut kissaatigaat inerteqquteqarnerup pinngoqqaatinut ulorianartunik qinngualanilinnit allanut uraniunngitsunut annertusineqarsinnaanera pillugu malittarisassassiorsinnaanerminnut, kiisalu pinngoqqaatinik ulorianartunik qinngualanilinnik pineqartunik qanoq annertutigisumik akoqarsinnaanermut killiliussanik aamma misissueqqaanermut, ujaasinnermut piiaanermullu akuersissutinik utertitsisarneq pillugu aalajangersakkanik ilanngussisinnaanerminnut piginnaatinneqarnissartik. Qulaani Naalakkersuisut akissutaat naapertorlugit assersuutigalugu thoriumimik piiasinnaanermik killiliilluni inerteqquteqarnerit Kalaallit Nunaanni aatsitassanik qaqtigoortunik piiaanissaq siunertaralugu suliniutinut arlalinut sunniuteqarsinnaavoq.

Inuussutissarsiornermut	Aatsitassanullu	Ataatsimiititaliap	malittarisassat
akuersissutigineqartut	ataatsimut	isigalugu	Kalaallit Nunaanni
aningsaasaliissuteqarususutsumik sapinngisamik siuarsaasarnissaat pingaaruteqartutut isigaa.			

Ataatsimiititaliap inuussutissarsiortut sinniisaannik oqaloqateqarneri tunngavigalugit Naalakkersuisut qinnuigineqarput nalunaarutip Inatsisartut inatsisaannut sanilliulluni piffissami sivikitsumi ilimasaaruteqareernikkut suliarineqarlunilu atuutsinneqalersinnaanera isummerfigeqqullugu. Nalunaarulli taamatuttaaq qaqugukkulluunniit naalakkersuisoqatigiit kissaateqarnerat malillugu nalunaarut piffissami sivikitsumi ilimasaaruteqareernikkut allanngortinneqarsinnaallunilu atuukkunnaarsinneqarsinnaavoq. Ataatsimiititaliap tamatumunnga ilanngullugu apeqqutigaa piginnaatitsissut (siunnersuummi § 2 naapertorlugu) aatsitassarsiornermik inuussutissarsiutilinnut patajaatsumik aningaasalersuerusussuseqarnerup innuttaasullu toqqissisimanerata qularnaarneqarnissaanut ataqatigiissinneqarsinnaanersoq.

Tamatumunnga tunngatillugu Naalakkersuisut ilaatigut oqaatigaat *ilumoorat nalunaarut piffissami sivikitsumi ilimasaaruteqareernikkut atuutilersinneqarsinnaasoq, allanngortinneqarsinnaasoq imaluunniit atorunnaarsinneqarsinnaasoq. Tamatumaniilu nalunaarutit allaffissornikkut eqaatsumik sakkussaasarput.*

Nalunaarut Inatsisartut inatsisaanniit sukanerusumik atuutsinneqalersinnaavoq, aammalu suliaq ingerlaneranut piumasaqaatit assignagit. Taamaalilluni nalunaarummi Inatsisartut inatsisaattut sukumiisumik suliarinninnerup ingerlanissaa qulakkeerneqarneq ajorpoq. Aammalu Naalakkersuisut nalunaarutini allanngortitsinissamut atorunnaarsitsinissamullu

periarfissaqarneranni, nalunaarut Inatsisartut inatsisaanni maleruagassiinermiit aalajaatsuunnginnerusarpog.

Inatsisissatut siunnersuummi inatsimmi tunngavissamut aalajangersakkami ilanngussinissaq Naalakkersuisut toqqarmassuk, pinngoqqaatit qinngornernik ulorianartunik akullit allat ajoqusiisinnaassusaat pillugu ilisimasaqalernermi sukkasuumik iliuuseqarnissamut periarfissaqarnissamik kissaateqarneq pissutaavoq. Pinngoqqaatinik ajoqusiisinnaasunik misissueqqaarnissap, misissuinissap pīaanissallu sukkasuumik inerteqqutigineqarnissaanut periarfissaqarnermi, assersuutigalugu aatsitassarsiorfiutiqatigiiffiit Inatsisartut inatsisaata akuerineqarsinnaalernissaa atuutsinneqalersinnaanissaa sioqqullugu, pinngoqqaatit taakkua pīarnissaannut pinsinnaatitaalersinnaanerat pinngitsoorneqassaaq.

Tamatumunnga atatillugu oqaatigineqassaaq nalunaarutit inatsisissatut siunnersuutit assigalugit akuersissutigineqannginnerminni tusarniaatigineqartarmata. Siunnersuutip tusarniaatigineqarsimaneranut takussutissiami (siunnersuummut ilanngussaq 1) aamma atuarneqarsinnaavoq siunissami nalunaarutaajunnartussat pinngoqqaatit ulorianartunik qinngualanillit allat pillugit malittarisassanik imallit tusarniaatigineqartarumaarmata, malittarisassallu taamaattut suliarineqarnerini inuussutissarsiortut innuttaasullu tamarmik peqataatinneqartarnissaat Naalakkersuisut sulissutiginiaraat. [Immikkoortoq kingulleq Inatsisartut nutserisoqarfianit kalaallisuunngortitaavoq naalakkersuisut akissutaanni nutserneqarsimanngimmat.]

Ataatsimiititaliami ikinnerussuteqartut oqaatigissavaat aatsitassarsiornermik ingerlatseqatigiiffiit aatsitassanik allanik ulorianartunik qinngualalinnik uraniunngitsunik pīaasinnaatitaanermik pissarsiniarlutik utaqqiinnarnerannik ”ernummateqarnertik” Naalakkersuisut tunngavissalersorsimanngimmassuk. Ataatsimiititaliami ikinnerussuteqartut ilanngullugu oqaatigissavaat inatsisitigut piumasaqaateqanngimmat nalunaarutit tusarniaatigineqarnissaannik Naalakkersuisunik peqqusisunik, taamaattumillu tunngaviusumik isigalugu tamanna Naalakkersuisut qaangiinnarsinnaallugu. Naalakkersuisut tusarniaasimaneq pillugu allakkiami ersersippaat siunissami nalunaarutaasartussat tusarniaatigisarniarlugit, ataatsimiititaliarli isumaqarpoq tamanna inuussutissarsiortut innuttaasullunniit sunngiamillunniit peqataatinneqarnissaannik qularnaarinninngitsoq. Taamatuttaaq tusarniaanerni akissutitut Naalakkersuisut isummernerat nakkutigineqarneq ajorpoq. Akerlianik Inatsisartut inatsisaata akuersissutigineqarnissaata tunngasut suleriaasiusoq periarfissiivoq susassaqtartut attuumassutillit tusarniaavigineqarsimanersut, taamatullu aamma Naalakkersuisut tusarniaanermik akissutitut ilumoortumik piviusumillu isummersimanersut nalilissallugu.

Ataatsimiititaliami ikinnerussuteqartut Siumup ilaasortaatitaasa tamanna

tunngavigalugu Naalakkersuisut qinnuigaat siunnersuummi § 2-p peerneqarnissaa siunertaralugu pingajussaaneerinninnissamut allannguutissatut siunnersuuteqaqqullugit.

Ikinnerussuteqartut tamatumunnga taarsiullugu Naalakkersuisunut kaammattuutigaat Inatsisartut inatsisissaannut siunnersuummik saqqummiussaqqaqqullugit, misissueqqinnerit takutissagaluarpasuk aatsitassat allat siunnersuummi inerteqquteqartitsinermut il.il. ilaatinneqarnissaannut pisariaqartitsisoqartoq Naalakkersuisullu, itisiliillutik, taamatut annertusisamik inerteqquteqarnerup kingunerisassaanut nassuiaateqarsinnaappata.

Ataatsimiitsitaliami eqqartorneqarnerani naaperiaaneq annertuumik ingerlanneqarsimagaluarpog iluatsinnanili, naak ilaatigut paragraffi iluaagineqartoq peerumallugu neqerooruteqartoqarsimagaluartoq. Amerlanerussuteqartut isumaqarput apeqqutigiumasanik nutaanik pinngortoqarsimanngitsoq taamaammatt uggornartutut oqaatigiumavaat uranisiornissamut inatsit tamakkiunneqarsinnaanngimmat. Uranisorusunnigikkaannimi inatsit una akuerineqartariaqartutut isikkoqarmat, aatsitassat qaqugutigooortunut, sanaartornermut tunngassuteqarani.

Siunnersuutip aningaasatigut kingunerisassai

Siunnersuutip aningaasatigut kingunerisassai nassuiaatit immikkoortuini 4-mi 5-milu allaaseriniarneqarsimapput, tassanilu atuarneqarsinnaalluni siunissami aatsitassarsiornermik suliniutinik taakkuluunniit ilaannik piviusunnngortitsinerit siunnersuutip pinaveerseriaannaagai, tamannalu pisortat aningaasaqarnerannik ineriartortitsinermut sunniisinnaasoq, ilanngullugu siunissami akileraarutitigut isertitassanut sunniisinnaalluni. Suliassat inerteqquteqarnermik aaqqissuussinermut sunnerneqartussaappata, pisinnaatitsissummik pigisaqartunut taarsiissutissanik tunniussinissamut imaluunniit allatut taarsiinissamut inatsimmi tunngavissamik siunnersuummi aalajangersaasoqanngilaq. Taamaattoq pisinnaatitsissummik pigisaqartut taamaattut allanik tunngavilimmik taarsiivigineqarnissaminnut imaluunniit allatut taarsiisoqarnissanik Namminersorlutik Oqartussat suliassanngortissinnaagaat, mattunneqarsinnaanngilaq.

Inuussutissarsiornermuit kingunerisassai eqqarsaatigalugit oqaatigineqarpoq siunnersuut inuussutissarsiortunut kalluarneqartussanut aningaasaqarnikkut allaffissornikkullu nammagassaqaqarnerulernerannik malitseqassasoq. Ilaatigut pisinnaatitsissummik pigisaqartut Naalakkersuisunut ingerlaavartumik nalunaarusiornissamut atugassanik uranimik misissuisarnissaat, siunnersuutip kingunerisaanik akuersissummut atugassarititaasuni nalinginnaasuni piumasaqaateqartoqartussaavoq.

Ataatsimiititaliap siunnersuummik suliarinninnerminut atatillugu oqaatigineqartut

itisilertinniarsimavai. Ataatsimiititaliap kissaatiginerusimassagaluarpaa isumaliutit ataatsimiititaliap apeqqutaanut Naalakkersuisut akissutaanni ersersinneqartut inatsimmut nassuiaatini kingunerisassat pillugit immikkoortuni takuneqarsinnaasimasuuppata.

Ataatsimiititaliap inassuteqaatai

Ataatsimiititaliami amerlanerussuteqartut Inuit Ataqatigiit ilaasortaataitaasa siunnersuutip akuerineqarnissaa inassutigaa.

Ataatsimiititaliami ikinnerussuteqartut Siumup ilaasortaataitaasa siunnersuut pillugu oqaatigissavaat:

Aallarniutigalugu oqaatigissavarput, ataatsimiitsitaliami immikkoortup uuma sammineqarnera tuaviuullugu suliarineqarmat akuersaanngilluinnaratsigu, periuserlu ernumanartutut isigaarput.

Apeqqut annertuujummat Ataatsimiitsitaliami toqqammavissaqarlualuta isumaliutissiissusiornitsinni apeqqutiniq arlaqangaatsiartunik qulaajaanissatsinnut piffissanik annertunerusumik pisariaqartitsivugut.

Allannguutissatut Naalakkersuisut siunnersuutaat nunatta ineriartorneranut aningaasarsiorsinnaassuseqarneranullu annertuumik sunniuteqartussaassut ilisimareerparput. Naalakkersuisut kissaatigaat;

- Qinnqornermik akoqassutsi 100 ppm qaangissanngikkaat.
- Killiliunneqartoq nunap immikkoortuinut tamanut atuutsissasoq, pineqartoq inoqarfinnut pinngortitamullu qanoq ungasitsigaluni inissisimamut apeqqutaatinnagu.
- Killeqanngiusartumik Naalakkersuisut pisinnaatinneqassasut, nalunaarusiornikkut navianartutut isigineqarsinnaasut allat Inatsisartut avaqqullugit aalajangersaaffigineqarsinnaanngornissaat.

Killiliunniarneqartoq arlalitsigut nunatta aningaasarsiorsinnaassutsikkut periarfissaanut kalluaasussaasoq naluneqanngereerpoq. Naalakkersuisut siunnersuutaanut atatillugu apeqqutit erseqqissumik akineqarsimanngitsut akineqartariaqartulli arlaqarput, ilaat ukuullutik;

- Ujaqqanik piaaffigineqartut eqqorneqassanersut.
- Ujaqqanik piaaffigineqalersinnaasut ilisimaneqartut eqqorneqassanersut.
- Aatsitassanut Inatsit akuersissuteqartussaannermut tunnganeruvoq, teknikikkut qanoq aaqquissuussisoqarnissaanut tunnganerunani. Taamaakkami inatsit killilersuinissamut ilusilersugaanera maanna amigaateqarpoq.

- Naalakkersuisut siunnersuutaat naapertorlugu, Inatsit avaqqullugu killilersuineruvoq, naak killiliussaq inatsimmi toqqaannaq piumasaqaasersuuteqarnissaa pisariaqaraluartoq, soorlu qinngornernik akullit qanoq passunneqarnissaanut tunngassuteqartut erseqqissumik piumasaqaasersorneqarnerisigut.
- Piffinni 100 ppm qaangertoorneqartassappat qanoq iliortoqarnissaa Naalakkersuisunit ilisimaneqanngilaq, tamannalu aningaasaleerusussuseqartut eqqarsaatigalugit tutsuiginassuseqarnermut annertuumik innarliisinnaavoq, innarleeriinngikkuni.
- Isumaliutissiisummi erserpoq, Kujalleq tamaat “uraneqarfusoq”, taamaattumillu allannguutissap malitsigisaanut tunngatillugu qanorpiaq inissisimasoqarnerisoq, erseqqissumik ilisimasariaqarpoq.
- Naalakkersuisut akiumanngilaat, siunnersuutigineqartoq aningaasaleerusussuseqartunut qanoq sunniuteqassanersoq, naak sunniuteqartussaanninnera Naalakkersuisunit uppersarsineqarusunngitsumik oqaatigineqaraluartoq.
- Naalakkersuisut tusarniaanermut atatillugu akissuteqaatinut akissuteqartarnerminni, 100 ppm apeqquserneqaraangat akissutigisannaavat tassaavoq, 100 ppm politikikkut isummernerusoq, naak Inatsisartut qanoq politikeqartoqarnissaanik sulii aalajangiussisimanngikkaluartut.
- Ataatsimiititaliami ataatsimiinnerup nalaani 81 ppm killiliussatut nutaatut Inuit Ataqtiginniit saqqummiunneqarpoq, naak sooq taamak saqqummiussisoqarnerisoq nassuiaatissaqartinneqanngikkaluartoq.
- Nalilerparput ataatsimiititaliami sulineq Inatsisartut sulinerat toqqammavigalugu isumaliutissiissusiornerunani, ataatsimiititaliami ilaasortat ataasiakkaat qanoq isumaqarnerannik taamaassorinninnerannillu tunngaveqarsimasoq.

Ataatsimiititaliami Siumut sinnerlugu ilaasortaasugut ataatsimut isigalugu naliliineraarput, paasissutissat eqqortut atorlugit sulisoqarsimanngitsoq aamma inuiaqatigiit kingullermik qinersisinneqarnerini oqariatuutigineqartut killormut saatillugit sulineq ingerlanneqarsimasoq.

Taamaattumik nunatta aningaasarsiorsinnaassutsikkut sammineqartumittaaq ajunnginnerpaamik periarfissaqarnissaa, pineqartumi pitsaanngitsumik inissinneqartussaasutut isigaarput, aamma inuiaqatigiittut namminersulernissatsinnut annertuumik kalluaasussatut aalajangiunniagaq isigaarput.

Ataatsimiititaliami ikinnerussuteqartut tamanna tunngavigalugu siunnersuutip itigartitsissutigineqarnissaa inassutigaa.

Taamatut oqaaseqarluni isumaliutissiisummilu oqaatigineqartutut paasinnilluni
ataatsiimiititaliap taamaalilluni siunnersuut aappassaaniigassanngortippaa.



Mariane Paviassen
Siulittaasoq



Lars Poulsen
Siulittaasup tullia



Charlotte Pike



Karl Tobiassen



Knud Mathiassen



Harald Bianco

Aslak Wilhelm Jensen



Inuussutissarsiornermut Aatsitassanullu Ataatsimiititaliaq
Erhvervs- og Råstofudvalget
Inatsisartut

UKA 2021/23
Ilanngussaq
Bilag A

UKA2021/23 aappassaaneernissaanut apeqqutitut akissuteqaatit

22-10-2021
Sags nr. 2021 - 9092

Apeqput 1. Uranimik piiaanissamut inerteqquteqarnermi 100 ppm-imullu killiliinerup atuutilernerani aatsitassarsiorinissamik suliniutit sorliit eqqugaassanersut Naalakkersuisunit ilisimaneqarnersoq siullermeerinninnermi apeqqutigineqarpoq. Misissueqqaarnermik, ujaasineramik piiaanermillu suliniutit akuersissuteqarfiusut maanna ingerlasut nalunaarsoqqullugit Naalakkersuisut ataatsimiititaliamit qinnuigineqarput, tamatumanilu paasissutissiissutigalugu taakku siunnersuummit eqqugaassanersut/qanoq eqqugaanersut.

Postboks 930
3900 Nuuk
Tlf. (+299) 34 68 00
Fax (+299) 43 02
E-mail: asn@nanoq.gl
www.naalakkersuisut.gl

Akissut: Aatsitassanik misissueqqaarnissamut aamma misissuinissamut akuersissutit amerlanersaasa iluanni uraneqarpoq, kisianni assigiinngitsunik annertussusilimmik. Kisianni peqarfiit ataasiakkaat aatsitassarsiorluni misissuinissamut siunnerfigineqartut imaluunniit peqarfiit nassarineqarsimasut, uranimut inerteqquteqarnermut inatsimmi killissaliussap 100 ppm-mik annertussuseqarnera ajornartorsiutigissagaat ilimanangilaq. Taamaattumik pisut amerlanersaanni pisinnaatitsissummik pigisaqartup aatsitassarsiorluni misissuinnermi suut siunnerfiginerai, peqatigisaanillu piiaanissamut akuersissummik qinnuteqaammik piareersaateqarfiginerai, ilisimaneqalinngippat, urani ajornartorsiutaassanersoq taamaassannginnersorluunniit nalilerneqarsinnaasanngilaq.

Sumiiffik akuersissuteqarfiusoq assigiinngitsunik suussusilinnik peqarfeqarsinnaasarpog. Akuersissutip ataatsip iluani peqarfiit ilai uranimik ajornartorsiuteqarfiusinnaapput, peqarfiillu allat ajornartorsiuteqarfiunngissinnaallutik. Assersuutissaavoq Sarfartumi Hudsonip aatsitassarsiorluni misissuinissamut akuersissut pigisaa. Sumiiffiup akuersissuteqarfiusup iluani assigiinngitsunik peqarfiit marluk paasineqarput. Peqarfiup aappaa maannamut uranimik ajornartorsiuteqarfiuvoq, kisianni aappaa taamaagani. Assersuutissaq alla tassaavoq Kalaallit Nunaata kujataa tamarmi, uraneqarfittut ilisimaneqartoq. Sumiiffimmi tassani tamatuma saniatigut kuulteqarfeqarpoq, saffiugassanik nalinginnaasunik (kanngussak, aqerloq, zink) peqarfeqarluni aammalu grafit-inik peqarfeqarluni. Peqarfiit taamaattut taakkua nalinginnaasumik uranimik ajornartorsiuteqarfiunngillat,

naak sumiiffiup akuersissuteqarfiusup pineqartup iluani annikitsunik uranimik peqarfeqaraluarluni.

Aatsitassarsiorluni misissuinissamut akuersissutit pingasut maannakkut inatsimmi inerteqquteqarnermit sunnerneqartussaapput, aatsitassarsiorluni misissuinissamut toqqaannartumik uranip siunnerfigineqarnera kisimi pissutaalluni (Orano Mining, akuersissutit 2), aammalu Greenland Minerals-imut tunngatillugu paasissutissanik nalunaarsugaqarpoq naatsorsuisoqarsimallunilu, inatsimmi killissaliussat qaangerneqarsimasut uppersarsaasunik. Ataasiakkaatigut nalilersuineq aalajangiinerlu malillugit pisinnaatitsissummik pigisaqartoq aatsitassarsiorluni misissuinissamut/piiaanissamut, uranimik ilaatitsiviunngitsumut, siunnersuummik suliaqarnissamik akuerineqassaaq.

Aatsitassarsiorluni misissuinissamut akuersissutitut atuutereersunut, 100 ppm-imik killissaliinermik aammalu inatsimmi nalinginnaasumik inerteqquteqarnermik ajornartorsiulertussanut, taamaalillunilu aatsitassarsiorluni misissuinerup imaluunniit uranimik piiaanerup ingerlaqqinnissaanut inerteqquteqarfiusunut allattuiffik:

- Orano Mining-ip aatsitassarsiorluni misissuinissamut akuersissutit pigisai tamarmik – Orano Mining sumiiffimmi akuersissuteqarfiusumi uranimik ujaasivoq. Maannakkorpiaq Orano ornigulluni suliaqarsimanngilaq, taamaattumillu peqarfinnik paasinarsisisimanani.
- MEL 2010-02 Greenland Minerals A/S – Kuannersuarni uraneqarpoq. Isumalluutitik naatsorsuinerup GME-meersup 250 ppm-nik agguaqatigiissillugu akoqartoq paasinarsisippaa.

Sumiiffinnik/sumiiffinnik akuersissuteqarfiusunik allanik peqarpoq, inatsimmi killiliussat sinnersimagai Aatsitassanut oqartussap ersersitsisimalluni (paasissutissat nalunaarsukkat annikitsut), kisianni uppersarsaatissaqarani imaluunniit uppersarsarneqarani. (Ilanngussaq 1 takuuk)

Siunnersuutip piiaanissamut akuersissutit pioreersut sunnissanngilai, tassami siunnersuut akuersissutitut siunnersuutip akuerineqareernerata kingorna tunniunneqartunut taamaallaat atuutissammat. Misissueqqaarnissamut, aatsitassarsiorluni misissuinissamut imaluunniit piiaanissamut akuersissutit tunniunneqareersut taamatuttaaq kalluarneqassanngillat. Paarlattuanik piiaanissamut akuersissutit inatsisip atuutilereernerani tunniunneqartut pineqartunut ilaassapput aammalu inatsit malittussaassallugu.

Pinngoqqaatinut qinngornernik ulorianartunik akulinnut allanut inerteqquteqarneq, siunnersuummi § 2 naapertorlugu aalajangersarneqartoq, piffissaq tamanna pillugu nalunaarutip aalajangersarneqarnera aallarnerfigalugu siusinnerpaamik atuutilertussaavoq. Siunissami pinngoqqaatinut qinngornernik

ulorianartunik akulinnut allanut inerteqquteqarnissaq taamaalilluni aamma piiaanissamut akuersissutitut pioreersunut atuuttussaangilaq.

Tassunga atatillugu suliniutitut ingerlasunut aallaaviatigullu uranimut tunnganngitsunut siunnersuutip sunniuteqarsinnaanera nalilersuiffiqeqarsimanersoq pillugu paasissutissanik pissarsisneqarnissani ataatsimiititaliap kissaatigaa.

Akuersissutit tamarmik, Aatsitassanut oqartussap ingerlaavartumik uranimik akoqarnerata nalilersorinnaanissaanut, ingerlaavartumik uuttortaasarnissaq aammalu paasissutissanik katersinissaq, aamma uranimut tunngatillugu, pillugit inatsimmi piumasaqaatinit sunnerneqartussaapput.

Uranimut killissaliussat naammassisinnaanissaat ajornartorsiutaasinnaasoq, ajornartorsiut aningaasaliisartumik eqqumaffigigaat aammalu annertunerusumik aningaasaliinnginnerminni pisut utaqqimaaraat, Aatsitassanut oqartussaq pisinnaatitsissummik pigisaqartunit oqariartorfigineqarpoq.

Apeqquut 2. Siunnersuutip akuersissutigineqarneratigut aatsitassanik aalajangersimasunik siunissami ujaasinissaq piiaanissarlu ajornarsisneqassanersoq/ajornakusuulersinneqassanersoq Naalakkersuisunit paasissutissiissutigineqarsinnaava? Matumani aatsitassat namminerminni radiup qinngualaneqanngitsut pineqarput. Assersuutigalugu Kuannersuarmi eqqaanilu pinnersaasiassanik piiaalluni annikitsumik piiaalluni suliniutit qanoq siunnersuummit sunnerneqarnissaat pillugu paasissutissinneqarnissaq ataatsimiititaliamit kissaatigineqarpoq.

Akissut: Pingaartumik teknologiimut mingutsitsinngitsumut atugassanik pinngoqqaatinik/aatsitassanik piiaanermi uran/thorium akuunerat ajornartorsiortitsisinnaavoq. Kalaallit Nunaata ukiorparujussuarni aatsitassanut qaqutigoortunorpiaq periarfissaqarfiusut nittarsaattarsimavai. Nittarsaassinnermi ilaatigut pissutaavoq Kina-p nunarsuarmi niuerfimmi annertunerpaarpajunera aammalu Kalaallit Nunaanni periarfissaqarfiusut pissutaallutik EU-mit aamma Amerikamit Avannarlermit soqutiginninnerup ujartuinerullu annertusiartornerat. Naalakkersuisut thorium-imut tunngatillugu inatsisissatut siunnersuummi paragraf 2 atussappassuk pingaartumik ajornartorsiut pilertussaavoq. Aatsitassanut qaqutigoortunut suliassat amerlanersai thorium-imik qaffasissumik akoqartarput, Killavaani peqarfik pinnani. Paarlattuanik peqarfiit ilaanni uranip akuunera annikittarpoq.

Aatsitassanut qinngornernik ulorianartunik, taamaalillunilu thorium-imik, akulinnut killilersuilluni inerteqquteqarneq, aatsitassat qaqutigoortut (REE) siunnerfigineqarlutik, kisianni aamma thorium aatsitassat immikkuullarissut suliarineqarneranni suliap ingerlanerani aamma saqqummertussaalluni

aammalu 'waste rocks'-iniilertussaalluni imaluunniit 'tailings'-iniilertussaalluni Kalaallit Nunaanni suliassanut arlalinnut pingaaruteqartussaavoq. Suliassat pilertussat arlallit, suliassat ilai aatsitassarsiorluni misissuinissamut akuersissummik peqarlutik, piiaanermi ajornartorsiulertussaapput, pissutigalugu peqarfiit aatsitassanik qinngornernik ulorianartunik qaffasissunik pinngortitamiittunik akoqarmata, pisumilu matumani taanna thorium-iulluni.

Suliassat taakkua tassaasussaapput:

- Kuannersuit (Kvanefjeld) – uran 250 ppm aamma thorium 800 ppm.
- Sarfartoq, Kalaallit Nunaata kitaa – REE-nik peqarfimmut atatillugu thorium-imik 1.000 ppm miss. akoqarpoq.
- Motzfeldt Tasia – tassani maannakkut akuisa, maannakkorpiaq uranimut 70 ppm-imi aamma uranimut 120 ppm-imi, isumalluummi 340 mio.t-mi agguaqatigiissillugu akuusut annertussuseqartut oqaatigineqartut attanneqarsinnaanersut naliliinissamut misissuinerit arlallit aammalu misissueqqissaarnerit arlallit pisariaqarput. Misissugassani ataasiakkaani urani 2.400 ppm angullugu uranimik akoqartut paasineqarpoq.
- Qaqaarsuk, Kalaallit Nunaata kitaa. Thorium-imik akoqarnera 1.000 ppm missaanniippoq.
- Milne Land, Tunumi peqarfik nunap iluani sioqqanik oqimaatsunik peqarfiusoq titanium-itaqartoq (rutil), zirkonium-itaqartoq (zirkon) aamma REE-nik (monazit) akoqartoq. Monazit REE-t saniatigut aamma thorium-imik akoqarpoq. Akui 1.000 ppm angullugu nikerarput.
- Tikiusaaq, Kalaallit Nunaata kitaa (akuersissuteqartoqanngilaq) Qaqaarsummut eqqaanarpoq REE-nik aamma fosfor-inik peqarluni, Qaqaarsummituut thorium 1.000 ppm missaani taamaaqataata missaanik annertussuseqarluni.

Tugtupit Kuannersuit eqqaanniittoq – uranitaqarpa? Tugtupit aatsitassaavoq sodalit-eqatigiinniittoq. Sodalit-eqatigiinni aatsitassanit allanit allaanerulluni tugtupit saffiugassamik oqitsumik beryllium-imik akoqarpoq. Beryllium 12-nik isotope-taqarpoq, tassani Be-9 tassaalluni isotop aalajaatsoq. Beryllium-imi isotope-t qinngornernik ulorianartunik akullit sukkasuumik nungujartortarput aammalu qinngorneri amerlanertigut tassaasarput qinngornerit alfa-t, ernumassuteqarnissamut pissutissaqalersitsinngitsut. Tugtupit ujaqqat sanianiittut inissisimaqatigippagit assersuutigalugu luvjarit, steenstrupin-itaqarsinnaasut, qinngornernik ulorianartunik pisoqarsinnaavoq. Qinngornerit ulorianartut piussappata taakkua tugtupit-imeersuussanngillat, kisianni steenstrupin-imeersuussallutik. Tugtupit-inik piiaanermi killissaliussap 100 ppm qaangerneqarnissaa nalilersorniarlugu tugtupit-inik peqarfinni uuttortaanernik suliaqartoqanngilaq.

Sumiiffimmi Kuannersuit eqqaanniittumi annikitsumik aatsitassarsiorluni ingerlataqarnernut tunngatillugu, sumiiffiup ilaa sorleq inatsimmit nutaamit eqqorneqassanersoq Naalakkersuisut maannakkorpiaq tamakkiisumik paasisimaaraat. Oqaatigineqassaaq sumiiffik ullumikkut GME-p aatsitassarsiorluni misissuinissamut akuersissummik peqarfia tamakkerluni eqqorneqanngissinnaammat, tassami sumiiffiit 100 ppm-imit annertunermik uranimik akullit kisimik inatsimmit eqqorneqartussaapput.

Sumiiffimmi ataatsimi 100 ppm sinnerlugu uranimik akoqartoq paasinarsissappat, sumiiffimmi tassani aatsitassarsiorluni ingerlatassanik suliaqartoqarsinnaassanngilaq, misissueqqaarnissamut akuersissut, aatsitassarsiorluni misissuinissamut akuersissut, piiaanissamut akuersissut imaluunniit annikitsumik aatsitassarsiornissamut akuersissut malillugu tamanna pinersoq apeqqutaanani.

Apeqquut 3. Aatsitassanik uranitalinnik maanna ujaasisoqarsinnaanera (immaqalu piiaasoqarsinnaanera) aallaavigalugu siunnersuut ingerlatseqatigiiffinnut ujaasisunut/aatsitassarsiortunut pilersuisunut qanoq pitsaanngitsumik kinguneqarsinnaanersoq Naalakkersuisunit nalilerneqarsimava? Kiisalu assersuutigalugu akileraarutinut akiliutit ikilinerisigut siunnersuut nunatta karsianut qanoq sunniuteqarsinnaanersoq Naalakkersuisunit nalilerneqarsimava?

Akissut: Naalakkersuisut pilersuisuusussanut imaluunniit nunap karsianut akileraarutinut akiliutit appasinnerulernissaanut sunniutaanerlussinnaasunik ataatsimut isigalugu nalilersuinngillat. Aallaaviuvoq aatsitassarsiorluni misissuinissamut akuersissutit tamarmik amerlanersaannut pilersuisuusussanut isumaqatigiissuteqarnissamut imaluunniit akileraarutinut akiliinissanut naatsorsuutigisat uppersarsarneqarsinnaannginnerat.

Aatsitassarsiorluni misissuinermi suliassanut nalorninartorsiorneq ataatsimut isigalugu annertooujussuuvoq. Maleruarneqartartoq tassaavoq, suliassanit 100-nit ataasiinnaq pissusiviusuni aatsitassarsiorfinngortartoq. Aatsitassarsiorluni misissuinermi suliassat ikittuaraannaat piiaanermik kinguneqartarput – amerlanerpaartai piviusunngortaratik. Tamatuma taakkua siunissami qanoq ineriartussanersut, aammalu inuiaqatigiinnut qanoq iluaqusiissanersut. eqqoriaruminaatsippaa. Taamaattumik nalilersuisoqassappat, tamanna annertooujussuarmik nalorninartortaqtussaavoq, aammalu Aningaasanut inatsimmi isertitassat missingersuusiorneqarsimanatik. Ileqquusumik Naalakkersuisut aatsitassarsiornermik inuussutissarsiutilinnit isertitassanik naatsorsuutigineqartunik missingersuusiornissaq mianersuuttooujussuusimavaat, tassami piiaanissamut akuersissutini ingerlasuni tunisassiornerup aallartinnissaanut aammalu aalajaatsunik ingerlaavartumik

isertitaqalersitsinissaannut suliap ingerlanerani ingerlaqqinnissaq ajornakusoortarsimammat.

Maannakkorpiaq ingerlatseqatigiiffik ataasiinnaq, Greenland Minerals, , aatsitassaqaarfik aamma uranimik akoqarluni, piiaanissamut akuersissummik qinnuteqaateqarluni ingerlavoq. Ingerlatseqatigiiffik ukiorpassuit ingerlaneranni aatsitassarsiorluni misissuineq ingerlassimavaa aammalu isumalluutiniq piiarneqarsinnaasunik paasinarsisitsisimalluni, ilanngullugulu aningaasaqarnikkut naatsorsuinernik suliaqarsimalluni. Taamaattumik aatsitassarsiorluni misissuineri suliaassanit "nutaanerusunit" allanit nalorninartoqarnera annikinneruvoq. Ingerlatseqatigiiffiup VSB-iani allassimavoq ingerlatseqatigiiffiit akileraarutaannit, iluanaarutinit akileraarutinit, royalty-nit, aammalu toqqaannartumik akileraarutinit A-nit ataatsimut katillugu agguaqatigiissitsineri ukiumut DKK 1,52 mia. naatsorsuutigineqartut. Kisitsit taanna Aningaasanut inatsimmi missingersuutini ilanngunneqanngilaq.

Apeqqu 4. Piiaanissamut Naalakkersuisut itigartitsinnaanngorlugit suliniutitut uranitalinnut akuersissutini atuuttuni piumasaqaatinik ilanngussisoqarsimasooq oqallinnermi oqaatigineqarpoq. Piumasaqaatit taamaattut imarisaat Naalakkersuisunit erseqqinnerusumik nassuiaatigineqarsinnaappat?

Akissut: § 37 naapertorlugu apeqquaqqaammut nr. 2016-115-mut taamanikkut Aningaasaqarnermut Aatsitassanullu Naalakkersuisup Randi Vestergaard Evaldsen-ip akissutaa innersuussutigineqarsinnaavoq, tassani akissuteqaammi Kalaallit Nunaata kujataata kitaani Kuannersuarni sumiiffimmut aatsitassarsiorluni misissuinissamut akuersissummumut 2010/02-mut Greenland Minerals A/S-imut tunniunneqarsimasumut tapiliussaq nr. 1-imi immikkoortoq 302 aamma 303 akissummi issuarneqarlutik. Akissuteqaammi akuersissummumut atugassarititaasut makkua issuarneqarput:

"302. Pisinnaatitsissummik pigisaqartoq pinngoqqaatinik qinngornernik ulorianartunik akulinnik piiaanissamut akuersissummik tunineqarnissamik qinnuteqarpat, takuuk immikkoortoq 301, Naalakkersuisut qinnuteqaat nammineerlutik aammalu arlaannik tunngaveqanngitsumik imaluunniit sumilluunniit tunngaveqanngitsumik itigartissinnaavaat. Qinnuteqaat ilaatigut politikikkut imaluunniit ingerlatsivimmi pinngoqqaatinik qinngornernik ulorianartunik akulinnik piiaanissamut akuersissummik tunniussisannginnissamik aalajangiineq tunngavigalugu itigartinneqarsinnaavoq. Qinnuteqaammik itigartitsineq pisussaaffeqarnermik akisussaaffeqarnermillu malitseqassanngilaq, ilanngullugu Namminersorlutik Oqartussanut, Naalakkersuisunut imaluunniit

Aatsitassanut Ikummatissanullu Pisortaqarfimmut taarsiinissamik akisussaaffiliissanani.

303. Pisinnaatitsissummik pigisaqartoq pinngoqqaatinik qinngornernik ulorianartunik akulinnik piiaanissamut akuersissummik tunineqarnissamik qinnuteqarpat, takuuk immikkoortoq 301, Naalakkersuisut pinngoqqaatinik qinngornernik ulorianartunik akulinnik piiaanissamut atugassarititaasut suulluunniit nammineerlutik aammalu killilersuutitaqanngitsumik aalajangersarsinnaavaat. Naalakkersuisut ilaatigut piiaanermi ingerlatanut, isumannaallisaarnermut peqqinnissamut, avatangiisinut, pisuussutini atorluaanermut aamma inuiaqatigiinni piujuartussamik iluaqutaasumik sunniutaasussanut atugassarititaasussanik kiisalu pisinnaatitsissummik pigisaqartoq Kalaallit Nunaanni Namminersorlutik Oqartussanut akiliuteqassanersoq aalajangersaasinnaapput. Naalakkersuisut tassunga ilanngullugu nammineerlutik aamma arlaatigulluunniit killilersuutitaqanngitsumik ukiumoortumik akitsuummik sumiiffiup akuersissummi pineqartumut ilaasup angissusaa tunngavigalugu naatsorsugaasumik akiliuteqarnissamik (nunaminertamut akitsuut) atugassarititaasussanik, akitsuummik aatsitassat piiarneqartut ilaalu ilanngullugit tunngavigalugit naatsorsorneqartumik akiliuteqarnissamik (tunisassiornermut akitsuut) atugassarititaasussanik imaluunniit suliaqarnermik akuersissummi pineqartunut ilaasumit aningaasatigut pissarsiat ilaannik Kalaallit Nunaanni Namminersorlutik Oqartussanut qupp. 2 akiliuteqarnissamik a

Paasissutissiissutigineqarsinnaavoq akuersissummut atugassarititaasut issuarneqartut suli atuummata, aammalu akuersissummut atugassarititaasut taamaaqatai, aatsitassarsiorluni misissuinissamut akuersissutinut allanut tunniunneqartunut, pinngoqqaatinik qinngornernik ulorianartunik akulinnik ilaqartunut, taamatuttaaq atuupput.

Apeqput 5. Piumasaqaatinut apeqquumi 4-mi taaneqartunut atatillugu piiaanissamik akuersissuteqannginnermik nalunaaruteqarnerup arsaarinninnertut isigineqarsinnaanera Naalakkersuisunit inatsisilerinikkut nalilersorneqarsimava?

Akissut: Siunnersuut taarsiissutitalimmik arsaarinnissuteqarnermut inatsisaanngilaq, taamaattumillu pigisanut pisinnaatitaaffinnik illersugaasunik taarsiissutitalimmik arsaarinnissuteqarnermut inatsimmi tunngavissaliinani. Taamaalilluni tamanna inatsimmi tunngaviusumi § 73-imi pigisani illersugaasuni taarsiissutitalimmik arsaarinninnertut akuliunnerunersoq ataasiakkaatigut

naliliisoqarpat, akuersissummi itigartitsisoqarsinnaanngilaq imaluunniit akuersissut annikillisinneqarsinnaanani imaluunniit uterteqquneqarsinnaanani. Aamma aatsitassanut ikummatissanullu inatsit atuuttoq malillugu akuersissutitut ittunik pigisanut pisinnaatitaaffiit illersugaasut taarsiissutitalimmik arsaarinnissutigineqarnissaannut periarfissaqanngilaq.

Atugassarititaasut apeqqu 4-mi taaneqartut naapertorlugit piiaanissamut akuersissummut itigartitsineq taarsiissutitalimmik arsaarinninnertut isigineqarsinnaassanersoq, ataasiakkaatigut naliliiffigineqassaaq, pisut arlalippassuit apeqqu taasussaallutik, aammalu Naalakkersuisut suliami aalajangersimasumi aalajangiinerannut atatillugu pisussaalluni. Suliami aalajangersimasumi naliliisoqarpoq itigartitsineq taarsiissutitalimmik arsaarinninnertut akuliunnerusoq, Naalakkersuisut inatsit tunngavigalugu itigartitsisinnaassanngillat, tassami siunnersuut taarsiissutitalimmik arsaarinnissuteqarnissamut inatsimmi tunngavissaliinngimmat.

Apeqqu 6. Suliniutinut ingerlasunut uranitalinnut atatillugu uranimik piiaanissamut nalinginnaasumik inerteqquteqarneq arsaarinninnertut isigineqarsinnaassanersoq Naalakkersuisunit inatsisilerinikkut nalilersorneqarsimava?

Siunnersuut taarsiissutitalimmik arsaarinnissuteqarnermut inatsisaanngilaq, taamaattumillu pigisanut pisinnaatitaaffinnik illersugaasunik taarsiissutitalimmik arsaarinnissuteqartarnermut inatsimmi tunngavissaliinani. Taamaalluni tamanna inatsimmi tunngaviusumi § 73-imi pigisani illersugaasuni taarsiissutitalimmik arsaarinninnertut akuliunnerunersoq ataasiakkaatigut naliliisoqarpat, akuersissummi itigartitsisoqarsinnaanngilaq imaluunniit akuersissut annikillisinneqarsinnaanani imaluunniit uterteqquneqarsinnaanani.

Taamaattumik Naalakkersuisut naliliinngillat uranimik piiaanissamut ataatsimut isigalugu inerteqquteqarnerup atuutsinneqalernera taarsiissutitalimmik arsaarinnissuteqarnertut isigineqarsinnaassasoq. Tassunga atatillugu oqaatigineqassaaq, siunnersuut akuersissutinut tunniunneqareersunut atuutinngimmat, kisianni taamaattoq assersuutigalugu piiaanissamut akuersissutinut inatsisip atuutilereernerata kingorna aatsitassarsiorluni misissuinissamut akuersissummut, inatsisip atuutilinnginnerani tunniunneqarsimasumut, nangissutigalugu tunniunneqartunut atuulluni.

Apeqqu 7. Apeqqu 5 aamma 6 naapertorlugit naliliinerit takutippassuk arsaarinninneq pineqarsinnaasoq Namminersorlutik Oqartussat taarsissuteqarnissaannik piumasaqaateqartoqarsinnaanera Naalakkersuisunit inatsisilerinikkut nalilersorneqarsimava? Tamatuma saniatigut taarsissuteqarnissamik piumasaqaataajunnartut qanoq annertutiginnissat Naalakkersuisunit nalilerneqarsimava?

Akissut: Siullermik oqaatigineqarsinnaavoq pisinnaatitsissummik pigisaqartunut, suliaasaat inerteqquteqarnermik aqqissuussinnermit sunnerneqarsimasinnaasunut, taarsiinermik tunniussinissamut imaluunniit allatut taarsiissuteqarnissamut siunnersuummi inatsimmi tunngavissamik aalajangersaasoqanngimmat. Taamaattoq pisinnaatitsissummik pigisaqartut allanik tunngavilimmik taarsiivigineqarnissaminnut imaluunniit allatut taarsiisoqarnissaanut Namminersorlutik Oqartussat suliaakkiullugit suliaakkiisinnaasut mattunneqarsinnaanngilaq.

Apeqqut 5 innersuussutigalugu oqaatigeqqinneqassaaq, siunnersuut taarsiissutitalimmik arsaarinninnermut inatsisaanngimmat, taamaattumillu itigartitsineq taarsiissutitalimmik arsaarinnissutaasusaaq naliliisoqarpat. piiaanissamut akuersissutit itigartinneqarsinnaasusaaq. Taamaattumik Naalakkersuisut naliliippata tamanna taarsiissutitalimmik arsaarinnissutaatinngu itigartitsisoqarsinnaasoq, Naalakkersuisut piiaanissamut akuersissummik tunniussinissaq aatsaat itigartissinnaavaat.

Taamaattoq tassunga atatillugu pisinnaatitsissummik pigisaqartup itigartinneqartup Naalakkersuisut aalajangiinerannik eqqartuussivinnut suliaakkiussinnaanera, tassungalu atatillugu itigartitsineq taarsiissutitalimmik arsaarinnissutaanerarlugu oqariartuuteqarnissaa, aamma mattunneqarsinnaanngilaq. Taamatut pisoqarnerani taarsiinissamut piumasaqaammut pisinnaatitsissummik pigisaqartoq aalajangersimasooq, suliaasaq aalajangersimasooq aammalu allatigut pisut arlalippassuit apeqqutaasusaaq.

Apeqqut 6 innersuussutigalugu oqaatigineqassaaq, Naalakkersuisut naliliinerat malillugu siunnersuutit akuerineqarnera imminermini taarsiissutitalimmik arsaarinninnerusinnaanngitsooq. Taamaattumik aamma Naalakkersuisut naliliinngillat Namminersorlutik Oqartussat inatsisip akuerineqarnerata malitsigisaanik taarsiivigineqarnissamik piumasaqaateqarfigineqarsinnaasut.

Apeqqut 8. Uramik piiaanissamut “angerneq” imaluunniit “naaggaarneq” pillugu innuttaasunik taasisitsisinnaaneq siullermeerinninnermi oqaluuserineqarpoq. Tamatumunnga isummernertik naatsumik nassuiaqqullugu Naalakkersuisut qinnuigineqarput.

Akissut: Naalakkersuisut uranimik piiaanissaq pillugu innuttaasunik taasisitsinissamik kissaateqanngillat. Partiit uranimik piiaanissamik inerteqquteqarnermik atuutsitsilernissaq kissaatigigaat, apriliimi qinersinnermut naalakkersuisooqatigiinni partiit qineqqusaarutaanni ilaavoq. Taamaattumik Naalakkersuisut isumaqarput inatsisissatut siunnersuut qineqqusaarnermi neriorsuutit naammassinninnerusoq. Ilitsersuisussamik innuttaasunik taasisitsineq aningaasartuuteqarfiungaatsiartusaaq, naggataatigullu uranimik piiaanissamut naalakkersuisooqatigiit isummernerannik

allanngortitsisusnaanani. Tamanna tunngavigalugu naliliisoqarpoq Inatsisartut innuttaasunit qinigaasut, taamaalillutillu nunatsinni qinersisartunut sinniisaasut, aalajangiissasut.

Apeqqu 9. Najugaqarfinnut qanittuni aammalu najugaqarfinnut ungasissuni uranimik piiannerit immikkoortinneqarsinnaanerit siullermeerinninnermi oqaluuserineqarpoq. Tamanna Naalakkersuisunit qanoq isumaqarfigineqarpa?

Akissut: Naalakkersuisooqatigiit pinngitsoqanngitsumik uranimik piiaanissaq itigartippaat. Tamanna aamma sumiffinni avinngarusimanerusumiittuni uranimik piiaanissamut atuuppoq. Naalakkersuisut tamanna tunngavigalugu uranimik piiaanissamut tunngatillugu ilaatitsinnginnernut tapersiisinnaanngillat. Taamaattoq Naalakkersuisut isumaqarput aatsitassarsiorfimmik ingerlatsinerit illoqarfimmi qanittumiittut kissaatigineqarnersut, ataatsimut isigalugu oqallisiginissaanut tunngavissaqarsinnaasoq. Apeqqu taanna aatsitassanut inatsisissami 2022-mi saqqummiunneqartussami oqallisigineqassasoq Naalakkersuisut kissaatigaat. Naalakkersuisut inatsisip taassuma saqqummiunneqarneranut atatillugu ataatsimut isigalugu aatsitassarsiorfiit illoqarfimmut qanittumiittut pillugit apeqqu uterfiginiarpaat.

10. Ataatsimiititaliap suliamik suliarinninneranut attuumassuteqartunik allanik Naalakkersuisut paasisutissiisinnaappat?

Inussiarnersumik inuulluaqqusillunga
Med venlig hilsen



Naaja H. Nathanielsen



Inuussutissarsiornermut Aatsitassanullu Ataatsimiititaliaq
Erhvervs- og Råstofudvalget
Inatsisartut

UKA2021/23 pillugit Naalakkersuisunut ilassutitut apeqqutit akissutai

22-10-2021
Sags nr. 2021-9092

Inuussutissarsiornermut Aatsitassanullu Ataatsimiititaliaq UKA2021/23
”Uranimik il. il., misissueqqaarnermut, ujaasinnermut piiaanermullu
inerteqquteqarneq pillugu Inatsisartut inatsisissaattut siunnersuut” pillugu
Naalakkersuisunut ilassutitut apeqqutit ulloq 18. oktober 2021 nassiussivoq.

Postboks 930
3900 Nuuk
Tlf. (+299) 34 68 00
Fax (+299) 43 02
E-mail: asn@nanoq.gl
www.naalakkersuisut.gl

Apeqqutit inatsisissatut siunnersuummi § 2-mut tunngassuteqarput, taanna
malillugu inerteqquteqarnerup (takuuk § 1) pinngoqqaatinut qinngornernik
ulorianartunik akulinnut allanut atuutsilerlugu annertusitinnissaanut
Naalakkersuisut piginnaatinneqarlutik.

A)

*Ataatsimiititaliap paasinninnera malillugu nalunaarut Inatsisartut
inatsisaannut sanilliulluni piffissami sivikitsumi ilimasaaruteqareernikkut
suliarineqarlunilu atuutsinneqalersinnaavoq. Taamatuttaaq sukkulluunniit
naalakkersuisooqatigiit kissaateqarnerat malillugu nalunaarut piffissami
sivikitsumi ilimasaaruteqareernikkut allanngortinneqarsinnaallunilu
atorunnaarsinneqarsinnaavoq. Tamanna tunngavigalugu pinngoqqaatinik
qinngornernik ulorianartunik akulinnik misissueqqaarnissamut,
misissuinissamut piiaanissamulluunniit nalunaarutikkut
inerteqquteqarnissamut piginnaatitsissuteqarneq aatsitassarsiortunut
aningaasaleerusussuttip patajaatsuunissaata inuiaqatigiillu
toqqissisimanissaasa qulakkeerneqarnissaannut
ataqatigiissinneqarsinnaasutut Naalakkersuisunit isigineqarpa?*

Akissut

Iluoorpoq, nalunaarut piffissami sivikitsumi ilimasaaruteqareernikkut
atuutilersinneqarsinnaasoq, allanngortinneqarsinnaasoq imaluunniit
atorunnaarsinneqarsinnaasoq. Tamatumanilu nalunaarutit allaffissornikkut
eqaatsumik sakkussaasarput.

Nalunaarut Inatsisartut inatsisaanniit sukkannerusumik atuutsinneqalersinnaavoq, aammalu suliap ingerlaneranut piumasaqaatit assignagit. Taamaalluni nalunaarummi Inatsisartut inatsisaattut sukumiisumik suliarinninnerup ingerlanissaa qulakkeerneqarneq ajorpoq. Aammalu Naalakkersuisut nalunaarutiniq allanngortitsinissamut atorunnaarsitsinissamullu periarfissaqarneranni, nalunaarut Inatsisartut inatsisaanni maleruagassiinnermiit aalajaatsuunnginnerusarpoq.

Inatsisissatut siunnersuummi inatsimmi tunngavissamut aalajangersakkami ilanngussinissaq Naalakkersuisut toqqarmassuk, pinngoqqaatit qinngornernik ulorianartunik akullit allat ajoqusiinnaassusaat pillugu ilisimasaqalernermi sukkasuumik iliuuseqarnissamut periarfissaqarnissamik kissaateqarneq pissutaavoq. Pinngoqqaatinik ajoqusiinnaasunik misissueqqaarnissap, misissuinissap piiaanissallu sukkasuumik inerteqqutigineqarnissaanut periarfissaqarnermi, assersuutigalugu aatsitassarsiorfiutiqatigiiffiit Inatsisartut inatsisaata akuerineqarsinnaalernissaa atuutsinneqalersinnaanissaalu sioqqullugu, pinngoqqaatit taakkua piiarnissaannut pisinnaatitaalersinnaanerat pinngitsoorneqassaaq.

Tamanna naapertuussorineqarpat, kingusinnerusukkut Inatsisartut inatsisaannut pinngoqqaatinik qinngornernik ulorianartunik akulinnik ajoqusiisartunik inerteqquteqarfiusunut, siunnersuummik saqqummiussisoqarsinnaassaaq.

B)

Taarsiullugu pinngoqqaatinik qinngornernik ulorianartunik akulinnik inerteqquteqarsinnaaneq

Naalakkersuisut tamatumunnga naammattumik tunngavissaqalerpata inatsimmiq

allannguinikkut atuutilersinneqarsinnaava?

Akissut

Tunngaviatigut siunnersuummi § 2-mi piginnaatitsissummik Naalakkersuisut atuinneginnissaat, tamatumunngalu taarsiullugu pinngoqqaatinut qinngornernik ulorianartunik akulinnut allanut inerteqquteqarnissap inatsisip allanngortinneqarneratigut atuutsinneqarlernissaa, akornuserneqanngilaq.

Taamaattoq Naalakkersuisut isumaqarput, pinngoqqaatinut qinngornernik ulorianartunik akulinnut allanut inerteqquteqarnerup nalunaarummi atuutsinneqalersinnaanissaa naapertuuttoq. Tamatumunnga pissutaasut pillugit apeqqummut A-mut akissut innersuussutigineqarpoq.

C)

*Inatsisartunit suliarineqarlunilu akuerineqartumik inatsimmik
allannguinnikkut*

*assersuutigalugu aningaasaliisartut pitsaannerusunik patajaannerusunillu
atugassaqartitaalernissaat qulakkeerneqarsinnaava?*

Akissut

Nalunaarummut taarsiullugu inatsisip allanngortinneqarneratigut inerteqquteqarnerup akuerineqarnerani, siunnersuutip Inatsisartuni suliarineqarnissaa taamaallaat qulakkeerneqartussaavoq. Tamatuma saniatigut inatsisip aatsaat Inatsisartuni suliarineqarnera malillugu allanngortinneqarsinnaanera imaluunniit atorunnaarsinneqarsinnaanera qulakkeerneqartussaavoq. Kisiannili nalunaarut nalunaarummi nutaami allanngortinneqarsinnaavoq imaluunniit atorunnaarsinneqarsinnaalluni.

Naalakkersuisut isumaqanngillat, taamaattumik inatsisip allanngortinneqarnerani pitsaannerusunik sinaakkutissanik atugassaqartitsinissaq qulakkeerneqanngissinnaasoq, tassami tamatumunnga maleruagassat imarisap aalajangersimasut apeqqutaammata. Taamaattoq nalunaarummi pinnani inatsisip allanngortinneqarneratigut inerteqquteqarnerup akuerineqarnera, pisut malillugit aalajaannerusunik sinaakkutissanik atugassaqartitsinissamik qulakkeerisussaasoq, oqartoqarsinnaavoq, tassami maleruagassat suliap sivisuumik ingerlareernerani aammalu Inatsisartuni suliarineqareernerani aatsaat allanngortinneqarsinnaammata imaluunniit atorunnaarsinneqarsinnaallutik. Taamaattoq apeqqummut A-mut akissummi allassimasut pissutigalugit, pinngoqqaatit qinngornernik ulorianartunik akullit pillugit nutaanik ilisimasaqalernermi tamanna tunngavilersorneqarsinnaappat, sapinngisamik sukkarnerpaamik nalunaarutikkut inerteqquteqarnermik atuutsitsilernissamik Naalakkersuisut periarfissaqarnissaat naapertuussorineqarpoq.

Tamatuma saniatigut oqaatigeqqissallugu pingaaruteqarpoq, nalunaarutit taamaallaat akuersissutinut nalunaarutip akuerineqareernerata kingorna tunniunneqartunut attuuttussaassasut.

Inussiarnersumik inuulluaqqusillunga
Med venlig hilsen



Naaja H. Nathanielsen



INATISARTUT

Ineqarnermut, Attaveqaasersuutitut,
Aatsitassanut, Inatsisit Atuutsinneqarnerannut
Naligiisitaanermullu Naalakkersuisoq
/MAANI

Ulloq: 11-10-2021

J.nr.:01.36.02.03-00257

UKA2021/23 “Uranimik il. il., misissueqqaarnermut, ujaasinermut piiaanermullu inerteqquteqarneq pillugu Inatsisartut inatsisissaattut siunnersuut” pillugu Naalakkersuisunut apeqqutit.

UKA2021/23-p siullermeerneqarnerani kiisalu ataatsimiititaliap siunnersuummik manna tikillugu suliarinninnerani oqaaseqaatit apeqqutillu tunngavigalugit apeqqutit matuma kingulianiittut akissuteqarfigeqqullugit Inuussutissarsiornermut Aatsitassanullu Ataatsimiititaliap Ineqarnermut, Attaveqaasersuutitut, Aatsitassanut, Inatsisit Atuutsinneqarnerannut Naligiisitaanermullu Naalakkersuisoq qinnuigaat.

Apeqqutit ilaat – isertuussinissaq eqqarsaatigalugu – oqaatigalugu akissuteqarfigineqarnissaat pitsaanerusoq Naalakkersuisut naliliippata, tamanna sapinngisamik piaartumik nalunaarutigeqquneqarpoq, tamatumunngalu ilanngullugu ilisimatitsiffiusumik ataatsimiinnissap ullusaaq siunnersuuteqarluni. Tassunga atatillugu oqaatigineqassaaq ataatsimiititaliap apeqqutai akineqartinnagit siunnersuutip suliarineqarnerata nangingineqarnissaanut Inatsisartunut inassuteqaammik saqqummiussisinaanani ataatsimiititaliaq isumaqarmat.

1. Uranimik piiaanissamut inerteqquteqarnermi 100 ppm-imullu killiliinerup atuutilernerani aatsitassarsiorinnissamik suliniutit sorliit eqqugaassanersut Naalakkersuisunit ilisimaneqarnerisik siullermeerinninnermi apeqqutigineqarpoq. Misissueqqaarnermik, ujaasinermik piiaanermillu suliniutit akuersissuteqarfiusut maanna ingerlasut nalunaarsoqqullugit Naalakkersuisut ataatsimiititaliamit qinnuigineqarput, tamatumanilu paasissutissiissutigalugu taakku siunnersuummit eqqugaassanersut/qanoq eqqugaanersut. Tassunga atatillugu suliniutitut ingerlasunut aallaaviatigullu uranimut tunnganngitsunut siunnersuutip sunniuteqarsinnaanera nalilersuiffigineqarsimanersaq pillugu paasissutissanik pissarsisinneqarnissani ataatsimiititaliap kissaatigaa.
2. Siunnersuutip akuersissutigineqarneratigut aatsitassanik aalajangersimasunik siunissami ujaasinissaq piiaanissarluk ajornarsisinneqassanersaq/ajornakusuulersinneqassanersaq Naalakkersuisunit paasissutissiissutigineqarsinnaava? Matumani aatsitassat namminerminni radiup qinngualaneqanngitsut pineqarput. Assersuutigalugu Kuannersuarmi eqqaanilu pinneraasiassanik piiaalluni annikitsumik piiaalluni suliniutit qanoq siunnersuummit sunnerneqarnissaat pillugu paasissutissinneqarnissaq ataatsimiititaliamit kissaatigineqarpoq.

3. Aatsitassanik uranitalinnik maanna ujaasisoqarsinnaanera (immaqalu piiasoqarsinnaanera) aallaavigalugu siunnersuut ingerlatseqatigiiffinnut ujaasisunut/aatsitassarsiortunut pilersuisunut qanoq pitsaanngitsumik kinguneqarsinnaanersoq Naalakkersuisunit nalilernerqarsimava? Kiisalu assersuutigalugu akileraarutitut akiliutit ikilinerisigut siunnersuut nunatta karsianut qanoq sunniteqarsinnaanersoq Naalakkersuisunit nalilernerqarsimava?
4. Piiaanissamut Naalakkersuisut itigartitsinnaanngorlugit suliniutitut uranitalinnut akuersissutini atuuttuni piumasaqaatinik ilanngussisoqarsimasoq oqallinnermi oqaatigineqarpoq. Piumasaqaatit taamaattut imarisaat Naalakkersuisunit erseqqinnerusumik nassuiaatigineqarsinnaappat?
5. Piumasaqaatinut apeqqummi 4-mi taaneqartunut atatillugu piiaanissamik akuersissuteqannginnermik nalunaaruteqarnerup arsaarinninnertut isigineqarsinnaanera Naalakkersuisunit inatsisilerinikkut nalilersorneqarsimava?
6. Suliniutitut ingerlasunut uranitalinnut atatillugu uranimik piiaanissamut nalinginnaasumik inerteqquteqarneq arsaarinninnertut isigineqarsinnaanersoq Naalakkersuisunit inatsisilerinikkut nalilersorneqarsimava?
7. Apeqqut 5 aamma 6 naapertorlugit naliliinerit takutippassuk arsaarinninneq pineqarsinnaasooq Namminersorlutik Oqartussat taarsissuteqarnissaannik piumasaqaateqartoqarsinnaanera Naalakkersuisunit inatsisilerinikkut nalilersorneqarsimava? Tamatuma saniatigut taarsissuteqarnissamik piumasaqaataajunnartut qanoq annertutiginissaat Naalakkersuisunit nalilernerqarsimava?
8. Uranimik piiaanissamut “angerneq” imaluunniit “naaggaarneq” pillugu innuttaasunik taasisitsinnaaneq siullermeerinninnermi oqaluuserineqarpoq. Tamatumunnga isummernertik naatsumik nassuiaqqullugu Naalakkersuisut qinnuigineqarput.
9. Najugaqarfinnut qanittuni aammalu najugaqarfinnut ungasissuni uranimik piiaanerit immikkoortinneqarsinnaanerat siullermeerinninnermi oqaluuserineqarpoq. Tamanna Naalakkersuisunit qanoq isumaqarfigineqarpa?
10. Ataatsimiititaliap suliamik suliarinninneranut attuumassuteqartunik allanik Naalakkersuisut paasissutissiisinnaappat?

Apeqqutitut siuliani allassimasunut allakkatigut akissut (kalaallisut danskisullu) sapinngisamik piaartumik tiguneqassasoq ataatsimiititaliamit qinnutigineqarpoq. Akissut qarasaasiakkut ataatsimiititaliap allattaanut (juul@inatsisartut.gl) kiisalu Inatsisartunut (inatsisartut@inatsisartut.gl) nassiateqquneqarpoq.

Inuussutissarsiornermut Aatsitassanullu Ataatsimiititaliaq sinnerlugu

Inussiarnersumik inuulluaqqusillunga

Mariane Paviasen

Mariane Paviasen

Ataatsimiititaliap siulittaasua



Ineqarnermut, Attaveqaasersuutitut,
Aatsitassanut, Inatsisit Atuutsinneqarnerannut
Naligiisitaanermullu Naalakkersuisoq
asn@nanoq.gl

Ulloq: 18-10-2021
J.nr.:01.36.02.03-00257

UKA 2021/23 pillugu Naalakkersuisunut ilassutitut apeqqutit

UKA2021/23 "Uranimik il. il., misissueqqaarnermut, ujaasinermut piiaanermullu inerteqquteqarneq pillugu Inatsisartut inatsisissaattut siunnersuut" pillugu Inuussutissarsiornermut Aatsitassanullu Ataatsimiititaliaq apeqqutit arlalinnik Naalakkersuisunut ulloq 11. oktober 2021-mi nassiussivoq.

Inatsisissatut siunnersuummi § 2 isummerfigeqqullugu Naalakkersuisut ataatsimiititaliamit qinnuigineqarput, taanna malillugu inerteqquteqarnerup pinngoqqaatinut qingornernik ulorianartunik akulinnut allanut aamma atuutsinneqalernissaanut Naalakkersuisut piginnaatinneqarput.

- A) Ataatsimiititaliap paasinninnera malillugu nalunaarut Inatsisartut inatsisaannut sanilliulluni piffissami sivikitsumi ilimasaaruteqareernikkut suliarineqarlunilu atuutsinneqalersinnaavoq. Taamatuttaaq sukkulluunniit naalakkersuisooqatigiit kissaateqarnerat malillugu nalunaarut piffissami sivikitsumi ilimasaaruteqareernikkut allanngortinneqarsinnaallunilu atorunnaarsinneqarsinnaavoq. Tamanna tunngavigalugu pinngoqqaatinik qingornernik ulorianartunik akulinnik misissueqqaarnissamut, misissuinissamut piiaanissamulluunniit nalunaarutikkut inerteqquteqarnissamut piginnaatitsissuteqarneq aatsitassarsiorturnut aningaasaleerusussutsip patajaatsuunissaata inuiaqatigiillu toqqissisimanissaasa qulakkeerneqarnissaannut ataqatigiissinneqarsinnaasutut Naalakkersuisunit isigineqarpa?
- B) Taarsiullugu pinngoqqaatinik qingornernik ulorianartunik akulinnik inerteqquteqarsinnaaneq Naalakkersuisut tamatumunnga naammattumik tunngavissaqalerpata inatsimmik allannguinnikkut atuutilersinneqarsinnaava?
- C) Inatsisartunit suliarineqarlunilu akuerineqartumik inatsimmik allannguinnikkut assersuutigalugu aningaasaliisartut pitsaanerusunik patajaannerusunillu atugassaqaartitaalernissaat qulakkeerneqarsinnaava?

Apeqqutitut siuliani allassimasunut allakkatigut akissut (kalaallisut danskisullu) sapinngisamik piaartumik tiguneqassasoq ataatsimiititaliamit qinnutigineqarpoq. Akissut qarasaasiakkut ataatsimiititaliap allattaanut (juul@ina.gl).

Isertuussinissaq eqqarsaatigalugu apeqqutit siuliani allassimasut oqaatsit atorlugit akineqarnissaat pitsaanerusoq Naalakkersuisunit nalilerneqarpat, tamanna piaartumik nalunaarutigeqquneqarpoq, tassungalu ilanngullugu ilisimatitsiffiusumik ataatsimiissinnaanermut ulluliussassatut siunnersuut nalunaarutigalugu.

Ataatsimiititaliaq sinnerlugu

Inussiarnersumik inuulluaqqusillunga



Mariane Paviassen

Ataatsimiititaliap siulittaasua